

Na Nipaakammun Juan Wi Màwà Tapin Na Padcha

1 ¹Na annayay nibru, mipangkop ta impaiyakammun Apudyus an Jesu Cristu wi màwa ta marungayi padcha. Impaakammun Jesu Cristu inuna ta mafalini maawatan na losani mansilfin siya na màwà tapin na padcha. Na anchanaya losan, foon pù mafayag ad màwà. Na nangipaakammuwan Jesu Cristu ta anchanayan Juan wi osay mansilfin siya, finaunnan anghelnà mangifaka. ²Ad à Juan, imfakana kon losani innilana ya chingngorna. Siyan na annayay nibru, siyan nangifag-ana ta ukud Apudyus wi tinàchoran ako Jesu Cristu. ³Siyan maragsak na takuy mamfasa ta annaya ta sangwanan na uchum, ya maragsak akon losani manchongor nu patkonchan ifagfakana, tan foon pù mafayag ad màwà losan na annaya!

Na Nanuratan Juan Ta Chachi Mamati Ta Pituy Ili

⁴À saoni Juan, annayan isurat-un chiayuy mamati wi maamuamung ta pituy ili ta provinsiyay Asia.

À Apudyus, sikud wi iniingkaw uray ta chamchamun na asinchawan, ya kanayun ingkaw, uray ta sana ya ingkanà ing-ingkana. Siyan sapay kuma ta fafadngan chitau losan ya patarnaona kon somsomòtau losan an Apudyus, ya Ispirituna ko wi pituy karasi na karobfongana, wi kanayun ingkaw ta sangwanan Apudyus wi turay, ⁵ya Jesu Cristu wi managpati wi mangipaakammu ta ifakan Apudyus. À Jesu Cristu, siyan nangipangpangu ta umuliyan matakawan na natoy, ya siya kon alin na losani turay ad asnay lufung.

Ad à Jesu Cristu, amod na ayatnan chitau, ad na natayana nifùfù na charanà nangilufusanen chitau, tan isù imfafarud chitau ta fasur, ⁶ya intapinà chitau ta manturayana, ya namfalinona kò chitau pachi wi mansilfin Amanay Apudyus. Siyan chaychayawontaù Jesu Cristu wi angatuwan ya mannakafalin wi manturay à ing-ingkana! Amen.

⁷Somsom-onyun annaya, wi asin umali Jesu Cristu wi mangkakawa ta lifuu, ad maid pu takù achi pu mangilan siya, tan uray chachi nanuyù an siya ta

nangtoyancha. Losani taku ta arutaruta, mamayogpogcha losan ta ogyatcha ta umaliyana tan sachin machusaancha. Ad sikurachuy màwan anchanyà!

⁸“Saon na lugrukina losan ya saon akon anungus na losan,” anan Apudyus wi mannakafalin, tan sikud wi iniingkaw ta lugrukina losan ya awad ako ta sana ya iingkaw akò ing-ingkana.

Na Nampail-an Cristu An Juan

⁹Saoni Juan wi sunudu, furun-ù chiayu wi mangan-anus ta maliglikatantau kapu ta namatiyantaun Jesu Cristu, ya furun-u ko chiayu ta mitapiyantau ta Manturayan Apudyus, uray awachà ta sana ad Patmos wi osay ili wi nangkakawa ta fayfay. Impaaliyà ad asna kapu ta nangiwarawakà ta ukud Apudyus ya katuttuwaan wi impaakammun Jesus an saon. ¹⁰Na osay Chumingku, iningkaw na impain-inop na Ispiritun Apudyus an saon, ad iningkaw na chingngor-u wi chakor wi kinga wi isù kingan na pupu wi nitutuptup ta odchokà. ¹¹Ad ananan saon, “Isuratnu losan na mipaila ya mipagngor an sia, ta ipaw-itnu ta chachi mamati wi maamuamung ta chachi pituy ili wi Efeso, Esmirna, Pergamo, Tiatira, Sardis, Filadelfia ya Laodicea.”

¹²Nantuwilinyà wi mangila ta sachin makaug-ugkud an saon, ad innilà na pituy papattayan à silaw, wi pasig falituk. ¹³Ad iningkaw na osay nangkakawa wi isù taku, wi manlagragkoykoy na luputna ya nararatan na far-uungnà falituk. ¹⁴Ad na fuùna, putilaan wi isù kapos. Na atana ko, isù kumilakilab wi apuy. ¹⁵Ad na chapanna ko, sumilisiling wi isù kantar wi nabsar. Ad na kingana, isù akasaas na lumuyluy-ud wi chanum. ¹⁶Ad na imanay chiawan, inoognanan pituy fituwon. Ad na tupònà, lummoswan osay tachomani sabli wi nansupang na ngarabna. Ad na fosarna ko, sumiling wi isun na siling na init na apigsana.

¹⁷Ad na sachin nangil-à an siya, nalitwachà ta sangwanana wi isuwà à natoy ta amochi ogyat-u. Sachin ad, inognanà saon ta imanay chiawan, ad anana, “Achia umogyat! Tan saon na lugrukina losan, ya saon akon anungus na losan. ¹⁸Saon à Apudyus wi maid matayana! Pinarufusà na long-ag-ù mapatoy, ad ta sana achiyà pu matmatoy. Saon na nginfiyang ta matoy ya anna kon karobfongà ta ikaw na natoy.

¹⁹“Siyán isuratnun losani mipailan sia, wi màwa ta sana, ya chachi màwà tapin na padcha. ²⁰Na mipangkop ta anchanayay pituy fituwon wi illam ta chiawani imà, ya anchanayay pituy papattayan à silaw, wi falituk, amasnan miningcha wi maid nangakammu. Na pituy fituwon, chichan miyalikan na pituy mangayyuwan ta chachi pituy ili. Ad na pituy papattayan à silaw, chichan miyalikan na takuy mamati ta chachi pituy ili.”

Na Mitudtuchu Ta Chachi Mamatid Efeso

2 ¹Ad anana, “Isuratnun annaya ta sachin mangayyuwan ta chachi mamatid Efeso:

“Saon à Jesu Cristu wi mamangchon ta pituy fituwon, ya saon akon mangkakawa ta pituy papattayan à silaw, wi falituk. Annayan ifakà an chiayu. ²Akammù na losani oy-oyyoonyu; akammù na mangan-anusanyuy man-iw-iwaar ta patingkan na lobfongyu. Akammù akon mallawinganyu ta lawingi taku, ya panoknokanyu kon katuttuwaan na chachi mangwanani apostolescha, ad inakammuyu wi tuliyancha. ³Tuttuway naanus-ayu, ya naparpalikatan-ayu kapu ta pammatiyun saon wi achiyu pu inwarang.

⁴“Mamfaru met losan chanat, ngim awad akon lawingò an chiayu, tan kummapsut na mangay-ayatanyun saon ya uray na susunudyu, wi foon pù isun na chamuna wi napigssan ayatyu. ⁵Somsom-onyu kuman ayatyu ta chamu, ta mamfafawiayu ad uliyonyun sachì chamuy iningwayu. Tan nu achiayu pun, umali aanon chiayu ta iwarangyuy mansilfi à isù silaw ta ikawyu. ⁶Ngim awad akon osay mamfaruwò an chiayu, tan kattoi lawrawingonyun oy-oyyoonyu chachi Nicolaita wi isun akon mallawingà.

⁷“Manchongor-ayu kuma ta losani ifagfakan na Ispiritun Apudyus an chiayu losan wi mamati ta ailiili!

“Ad chachi takuy achi pu paafak ta lawing, parufusà na makaanancha ta fungan na ayu wi awad ad langit ta ikaw Apudyus, wi sachì kon mangatod ta mannaynayuni fiyag.”

Na Mitudtuchu Ta Chachi Mamatid Esmirna

⁸Anana ko, “Isuratnu kon annaya ta sachì mangayyuwan ta chachi mamatid Esmirna:

“Saon na lugrukin na losan ya anungus akon losan, ya saon akon sachì natoy wi ummuli nataku. Ad annayan ifakà an chiayu. ⁹Akammù losan na maparpalikatanyu ya kinakapusyu. Ngim na katuttuwaan, fafaknang-ayud langit kapu ta pammatiyun saon. Ad akammù akon lawingi ifagfakachan chiayu wi mangwanani takun anu Apudyus chicha kapu ta kina-Judiocha, ngim foon tan chichan takun Satan! ¹⁰Sian na ifakà an chiayu, achiayu umogyat ta sinumani liglikat wi umchas an chiayu. Tan à Satan, pachasonay mangaan ta pammatiyu wi mangwà mifaruchanyuy uchum. Ngim simpuru kay padchan maparpalikatanyu ad sachì. Siyan oognanyun pammatiyun saon, uray siyan iyatoyyu, ad kunkunaà chiayù tapin na padchà mannaynayuni fiyag.

¹¹“Manchongor-ayu kuma ta losani ifagfakan na Ispiritun Apudyus an chiayu losan wi mamati ta ailiili!

“Ad chachi takuy achi pu paafak ta lawing, achicha pu mitapi ta kachusaan wi maawakan à pigwan na matayan.”

Na Mitudtuchu Ta Chachi Mamatid Pergamo

¹²Anana ko, “Isuratnu kon annaya ta sachì mangayyuwan ta chachi mamatid Pergamo:

“Saon na mamangchon ta tachomani sabli wi nansupang na ngarabna. Ad annayan ifakà an chiayu. ¹³Akammù na ikawyu wi isù finumroyan Satan tan siyan turay ad asnat. Ngim akammù wi ay-ayatonà an chiayu tan foon à nan-awichanyun pammatiyu uray na nangtoyan na kailiyanyu ta sunudyuy Antipas wi osay mangipapakat wi nangipaakammu ta mipangkop an saon.

¹⁴“Ngim anna ko kan uchumi lawingò mipangkop an chiayu, wi na osa, awad na uchum an chiayu wi manursurut ta intudtuchun Balaam ta awi, wi siya, tinudtuchuwanà Balak à mangawis ta chachi kanà Israel ta fummasurancha. Tan intudtuchunan manganan ta sachì nichatun ta sinan-Apudyus, ya mangwaan na lallarai ya fubfufai ta linuruku. ¹⁵Ya isuna koy awad na uchum an chiayu wi manursurut ta tudtuchun chachi Nicolaita. ¹⁶Siyan ifafawiyun fasuryu! Tan nu achiyu pun, umalì chusaon chachi taku wi usarò na ukud-u wi niyalig à sabli wi lumoswa ta tupòu.

¹⁷“Manchongor-ayu kuma ta losani ifagfakan na Ispiritun Apudyus an chiayu losan wi mamati ta ailiili!

“Ad chachi takuy achi pu paafak ta lawing, adchò an chichan maan wi awad ad langit. Ya adchò ako ta waschi osan mamputilà wi fatu wi niyugisan na faruy ngachan, wi maid pu uchum à nangakammu nu achi afus na maadchana.”

Na Mitudtuchu Ta Chachi Mamatid Tiatira

¹⁸Anana ko, “Isuratnu kon annaya ta sachì mangayyuwan ta chachi mamatid Tiatira:

“Saon na Anà Apudyus, wi na atà, isù kumilakilab wi apuy, ad na chapan-u ko, sumilisiling wi isù kantar wi nabsar. Ad annayan ifakà an chiayu. ¹⁹Akammù losan na oy-oyyoonyu ya kinapigsan na ayatyu ya kinapiyaryu, ya mangipatiyanyu wi mansilfin saon, ya mangananusanyu ta uray sinumani likat. Akammù ako wi ummad-achun oyyoonyuy mamfaru ta sana nu iningwayu ta chamun na namatiyanyu.

²⁰“Ngim anna kon osay lawingò mipangkop an chiayu, tan parufusanyun mantudtuchuwan na osay akinsusuru wi isun Jezebel, wi mangwanani profetan anu Apudyus, ad sikapana chachi mansilfin saon à fumasurancha. Tan itudtuchunan mangwaan na lallarai ya fubfufai ta linuruku, ya manganancha ta maan wi nichatun ta sinan-Apudyus. ²¹Winayaà na mamfafawiyana, ngim achi pun tan linawingnay mangiwarang ta akaisawan wi oy-oyyoona. ²²Siyan oyyoò na amochi masakitana wi maid miyisuwana ta achi pu makafangon ta katli, ad isun akon màwa ta chachi nakarukun siya. Siyan amod na mamalikatà an chicha losan nu achicha pu ifafawi ya iwarang na chachi lawingi oy-oyyooncha. ²³Ad ako, otyò losan chachi sumurut an siya ta awad mangakammuwan na losani mamati ta ailiili wi à saon, akammù na

losani somsomò ya pion na taku. Ad adchò akon sufalit na oy-oyyoon na losani taku, wi mamfaru winnu lawing.

24 “Ngim na uchum an chiayud asnati Tiatira, wi foon pù nanurut ta tudtuchun na sachifufai ya foon pu kò inacharyu chachi ananchay naunog wi tudtuchun Satan, maid uchum à ifakà an chiayù maam-amchan na likatyu.

25 Tan na ifakà yakay an chiayu, oognanyun pammatiyu ingkanà umaliyà.

26-28 “Ad chachi taku wi achi pu paafak ta lawing, wi ipapatichay mangwa ta piò ingkanà matayancha, chichan mangipatawiche ta isun na kinapigsan na amfikaton, ya adchò akon chichan mannakafalincha wi manturay ta arutaruta wi isun na nangadchan Ama ta mannakafalin-u ko wi manturay. Ya manturayò ako chicha wi amod na inyòoyyacha wi maid pu makaafak an chicha, ad na losani achi pu mapyu, machusacha wi isuchà fanga wi machiwin ad nabnabtà.

29 “Manchongor-ayu kuma ta losani ifagfakan na Ispiritun Apudyus an chiayu losan wi mamati ta ailiili!”

Na Mitudtuchu Ta Chachi Mamatid Sardis

3 ¹Anana ko, “Isuratnu kon annaya ta sachimangayyuwan ta chachi mamatid Sardis:

“Saon na niyamungan na Ispiritun Apudyus wi pituy karasin karobfongana. Ya saon akon mamangchon ta pituy fituwon. Ad annayan ifakà an chiayu. Akammù losan na oy-oyyoonyu, ya akammù ako wi nanchinamag wi makafiyag-ayun Apudyus. Ngim na katuttuwaan, isù nanattoy-ayun siya tan tupòyu kan ikaw na pammatiyu! ²Ya isuayu kò nasusuyop, siyan fumangon-ayu ta papigaonyun sanati aiti pammatiyu ta achi miyungus. Tan mailà wi chaan pù miyustuustun Apudyus na oy-oyyoonyu. ³Siyam somsom-onyu chachi nitudtuchun chiayu wi chingngoryu ta chamu, ta sachin patiyonyu ad ifafawiyun fasuryu. Tan nu achiyu pu faliwan chachi, umali chusaon chiayu wi achiyu pu mapuutan wi isun na umaliyan na osay man-akaw.

⁴ “Ngim awad na uchum an chiayud asnati Sardis wi foon pù nitapi ta fummasuran na kaachuwan, wi isù foon pù namansaan na luputchu. Siyan masilupanchà mamputilà ya mifuruncha kon saon à tapin na padcha tan annan karobfongancha kapu ta kinaustun na pammaticha.

⁵ “Ad chachi taku wi mangafak ta lawing, isuna koy masilupanchà mamputilà. Ya foon pù aanò na ngachancha ta sachinibruy nilistaan na ngadngachan na losani makafiyag an Apudyus à ing-ingkana, tan siyan ifakà ta sangwanan Ama, ya chachi aanghelesna, wi chichan takù.

⁶ “Manchongor-ayu kuma ta losani ifagfakan na Ispiritun Apudyus an chiayu losan wi mamati ta ailiili!”

Na Mitudtuchu Ta Chachi Mamatid Filadelfia

⁷Anana ko, “Isuratnu kon annaya ta sachimangayyuwan ta chachi mamatid Filadelfia:

“Saon à Jesus wi naapudyusan ya katuttuwaan. Saon akon mamangchon ta turfì na Manturayan Apudyus ad langit wi niyalig à foroy David. Siyan nu saon na mangib-at ta onob, maid pu makaiyonob. Ad nu saon na mangiyonob, maid pu ko makaib-at. Ad annayan ifakà an chiayu.

⁸“Akammù na losani oy-oyyoonyu, ya akammù ako wi ait yakan kinapigsayu. Ngim achifali tan impapatiyuy nanursurut ta losani tudtuchù ya achiyu pù saon nan-awichan. Siyan isù niwayang na liwangan an chiayu wi maid pu makaiyonob.

⁹“Siyan mailayun oyyoò ta chachi takuy nanturtulli wi mangwanani Judiocha nu wi takun Apudyus ngim foon tan takun Satan chicha. Siyan awad na oyyoò an chichà mampalintumongancha ta sangwananyù manayawanchan chiayu, ad siyan mangilasinancha wi ay-ayatò chiayu.

¹⁰Ad kapu ta pintogyun sachì imfakà wi anusanyun likat, sasallaknifà chiayu ta amochi likat wi mipachas ta losani takuy foon pù matatid asbay lutà mail-an na kinatatakun na losani taku.

¹¹“Chanchanin mangulinà, siyan oognanyun pammatiyun saon ta maid pu makapros ta kunkunayu wi mannaynayuni mafiyakanyun Apudyus.

¹²Ad sinumani takuy achi pu paafak ta lawing, ipuistù chicha ta Tempon Apudyus à ing-ingkana. Ad imarkà akon chichan ngachan Apudyus ya ngachan akon ilina wi faruy Jerusalem, wi mipatukad wi marpun Apudyus ad langit. Ya imarkà akon chichan faruy ngachan-u.

¹³“Manchongor-ayu kuma ta losani ifagfakan na Ispiritun Apudyus an chiayu wi matatid ta ailiili!”

Na Mitudtuchu Ta Chachi Mamatid Laodicea

¹⁴Anana ko, “Isuratnu kon annaya ta sachì mangayyuwan ta chachi matatid Laodicea:

“Saon na nangachanan à Tuttuwa ya Mapipiyyar tan saon na mangipaakammu ta katuttuwaan mipangkop an Apudyus. Ya saon akon narpuwan na losani iningwan Apudyus. Ad annayan ifakà an chiayu. ¹⁵Akammù na losani oy-oyyoonyu, wi maid pu manturungan na pammatiyu tan isuayù nan-amungan na man-atung ya mantakaliyong. Siyan piò wi lìnaon kuman kinaatungyu winnu kinatakaliyongyu!

¹⁶Ngim kapu ta isuayù nan-amungan na man-atung ya mantakaliyong, isù sumraayun saon, siyan itubfà chiayu! ¹⁷Siya ananyun maid mangkuranganyu, tan wachawad anun losani masapuryu, ad na somsomòyu, fafaknang-ayu losan. Ngim foon pù akammuyu wi na katuttuwaan, chiayun akapusan ya kakkaasi tan isuayù nafofodchangan ya nakurap. ¹⁸Siyan na ifakà an chiayu, saon kuman mangar-anyu ta napungsan wi falituk wi siyan ustuy pammati, tan sachin isù tuttuway fumaknanganyu. Ya saon akon mangar-anyu ta putilaani luput ta

masilupan-ayu tapnu maaan na mafainanyu wi nafofodchangan. Ad mangaraayu kon saon ta akas à maakasan na kurapyu ta makailaayu asin.¹⁹ Losani takuy ay-ayatò, omorà ya disiplinaò chicha. Siyan sosomonyun annayay itudtuchù ad ifafawiyun fasfasuryu.

²⁰ “Chongronyuna! Tan annaà wi isù sumisiad ta sangwanan na somsomòyu wi mangkongkokongkong. Ad sinumani mangngor an saon ya ib-atanan somsomònà ad parnoonà, mamfurfurun-ani wi isù manufungan na chuway taku.

²¹ “Ad losani achi pu paafak ta lawing, ichapat-u chicha patìchuwon an saon wi makaturay wi isun na iningwan Ama an saon ta nangafakà an Satan.

²² “Manchongor-ayu kuma ta losani ifagfakan na Ispiritun Apudyus an chiayu losan wi mamati ta ailiili!”

Na anchanya losan, impaisurat Jesu Cristun saon.

Na Machayawan Na Sachi Tumutùchu Wi Manturay Ad Langit

4 ¹Narpas pun na sachì, nantangachà ad langit ad nipailan saon na osay liwangan wi naiib-at. Ad asin-u ko chingngor na kingan na sachì chamuy nakaug-ugkud an saon wi isù pupun kingana. Ad anana, “Waynusna ta ipailà an sian masapur mapasamak à tapin na padcha.” ²Sachi ad, nan-ipangatuwà ta Ispiritun Apudyus ad langit. Ad innilà na umaachuy ta parangkan na Ali. ³Ad na itchuran na sachì tummutùchu, musilingan wi isun na musiling na chachi man-anginay fatu wi ananchay haspe ya karnelia. Ad naliwos akon sachì tummutùchuwanà afungar wi isun na siling wi fatu wi ananchay esmerelda. ⁴Ad iningkaw akon chuwapuru ya opati aachuyani nampalìwos ta sachì osay parangka wi tummutùchuwan na chuwapuru ya opati mangipangpangu. Ad nasilupanchà mamputilà ya nakoronaanchà falituk. ⁵Ad iningkaw akon marpu ta sachì tummutùchuwan Ali wi sumsumlit wi ilat ya kichuur na ichur. Ad na sangwanana ko, iningkaw na pituy silaw wi kumilakilab, wi chichan pituy karasin na karobfongan na Ispiritun Apudyus. ⁶Ad na sangwanan akon sachì tummutùchuwan, iningkaw na lin-ongan wi fayfay wi isù mail-an na sarming.

Ad iningkaw akon nampalìwos ta tummutùchuwan Ali wi opati parsuwa wi losan atan ochogcha ya uray akon fuwwangancha. ⁷Na osa, isù layon na itchurana, ad na miyagwa, isù faka. Ad na miyatlu, isù fosar na takun fosarna, ad na miyapat, isù manitit wi tumattattayap. ⁸Ad losan chachi opat, sin-onnom na payàcha wi losan ako ata, ya uray na long-agcha. Ad padchaoncha ya lafiyoncha mangkantakanta wi maid pu umillongan na kankantacha wi anancha,

“Maid pu miyisuwan na kinafarun na Aputauy Apudyus wi Mannakafalin, tan siyan afaruwan. À siya,

iniingkaw ta lugrukun na asinchuwan, ya awad ako
ta sana, ya iingkaw akò ing-ingkana.”

⁹ Ad chachi opati parsuwa, siya ikankantachan kinafarun na sachì tumutùchuy Ali, ya chaychayawoncha ya manyamayamanchan siyay natatakù ing-ingkana. Ad na mangkankantaancha, ¹⁰ mampalintumong na chachi chuwampuru ya opati mangipangpangu ta sangwanan na sachì tumutùchu ta manayawanchan siyay natatakù ing-ingkana. Ad inigkachan koronacha ta sangwanana, ad ananchay mangkankanta,

¹¹ “Apuni wi Apudyus, karobfongam
wi machayaw kapu ta kinafarum ya mannakafalinnu,
tan sian nangwa ta asinchuwan. Ad kapu ta ayatnu,
siyan nàwaan ya natakuwan na losan.”

Na Pannilu Ya Sachi Naruruut Wi Papil

5 ¹ Ad iningkaw akon innilà wi naruruut wi papil wi inoognan na sachì tumutùchu ta chiwawani imana. Ad na sachì papil, namfinisà naug-isan ya nangampitun taodna. ² Ad iningkaw akon innilà wi osay oschorani anghel wi chinakornan kinganay mangwanani, “Sinun awad karobfonganay mangobfad ya mangukrad ta annayay naruut wi papil?”

³ Ngim maid pu nginlobfong mangukrad ta sachì naruruut wi papil, uray ta chachi ingkaw ad langit ya ad asnay luta, ya uray akon losani nan-ootoy. ⁴ Ad nalluruwàà tan maid pu nàchasan à nginlobfong. ⁵ Ngim anan na osa ta chachi mangipangpangu an saon, “Akay, achia malluwa, tan anchiyan naawakan à Layon wi siyan nangatuy kanà David, wi kanà ako Juda. Ad inafaknà Satan ad siyan nginlobfong wi mangib-at ta sachì papil wi nangampitun taodna, siyan ukrachona ad fasaona.”

⁶ Sachì ad innilà na Pannilu wi summisiad ta nangkawaan na chachi mangipangpangu ya uùchuwan Ali wi linìwos na chachi opati parsuwa. Ad na sachì Pannilu, mamàilan pilat ta natayana. Nasàkuchan à pitu ya pitu kon atana wi chichan miyalikan na pituy karobfongan na Ispiritun Apudyus wi nifaun ta losani lukar ad asnay luta.

⁷ Sachì ad ummachanin sachì Pannilu ta sachì tumutùchuy Ali wi nangara ta naruruuti papil wi inoognana ta chiwawani imana. ⁸ Ad innarana pun na papil, nampalintumong losan chachi opati parsuwa ya chachi chuwampuru ya opati mangipangpangu ta sangwananay manayaw an siya. Ad losan chachi mangipangpangu nanangchon à isù kitara ya chuyug wi falituk wi nanapnù fangfangu insenso, wi miyalikan na luwarun na losani takun Apudyus. ⁹ Ad kinantachan faruy kanta wi anancha,

“Sia kan afusi nginlobfong wi mangara ta naruruut
wi papil wi nangampitun taodna,
ya sia kan annan karobfonganay mangib-at ya mamasa,

tan sian napatoy wi nifùfù na charam.
 Ad sachin imfayadnu ta taku
 ta mafalini mantakun Apudyus chicha.
 Ad losan chachi sinubfutnu,
 narpucha ta losani aapuapuun na taku
 ta ailiili ta arutaruta
 ya awad akon narpu ta losani
 mansabsafali wi ug-ugkud.

¹⁰ Ad intapim ako chicha ta manturayam,
 ya namfalinom ako chichà
 pachi wi mansilfin Apudyus.
 Siyan chichan manturay ad asnay lutà
 tapin na padcha.”

¹¹ Ad nantollongà pun, chingngor-un kingan na ad-adchuwani
 aangheles wi achi pu mafilang tan alifulifucha, wi naag-agssad wi
 linìwoscha chachi opati parsuwa ya chachi mangipangpangu ya sachì
 tumutùchuwan Ali. ¹² Ad chinakorchay mangankanta wi anancha,

“Na annayay Pannilu wi napatoy,
 siyan afusi annan karobfonganay mipangatu ya machayaw,
 ya maid pu miyisuwan na kinafaknangna ya kinaraingna
 ya uray mannakafalinna ya kinafaruna.”

¹³ Sachi ad chingngor-u kon nangankantaan na losani parsuwa, wi
 ingkaw ad langit ya asnay luta, ya losani ingkaw ta fayfay, ya losan
 akoy ingkaw ta awachan na nan-oootoy. Ad losancha makakankanta wi
 anancha,

“À siyay tumutùchuy Ali ya sachì Pannilu,
 machaychayawchà ing-ingkana ya mifakafakan
 kinafarucha ya kinangatucha
 ya mannakafalinchà ing-ingkana.”

¹⁴ Ad anan chachi opati parsuwa, “Amen!” Ad nampalintumong chachi
 mangipangpangu wi manayaw.

Na Naobfachan Na Nangampituy Taod

6 ¹Sachi ad innilà na Pannilu wi nangobfad ta sachì pituy taod
 ta naruruut wi papil. Ad na nangobfachana ta chamuy taod,
 chingngor-un kingan na osa ta chachi opati parsuwa wi isù ichur na
 ingkigkingana, wi anana, “Waynu!” ²Ad innilà na osay mamputilà wi
 afayu wi lummoswa. Ad iningkaw na nangaabfayu wi nanangchon à
 pana wi umoyna ikufat. Sachì ad naadchan à siyà korona, ad lummigwat
 wi umoy makakufat ta losani afusurna wi siyan mangaafak.

³Sachi ad inobfad akon sachì Pannilun miyagway taod, ad chingngor-u
 kon kingan na miyagway parsuwa wi anana, “Waynu!” ⁴Ad lummoswa

kon mancharaaki afayu. Ad na nangaabfayu, naadchan à chakor à sabli ya mannakafalin à manachail ta timpuyug na takud asnay luta ta mampipinnatoy na atakutaku.

⁵Sachi ad inobfad akon sachin Pannilun miyatluy taod, ad chingngor-u kon kingan na sachin miyatluy parsuwa wi anana, “Waynu!” Ad na nangil-à, lummoswan osay mangngititi afayu, wi na nangaabfayu, inoognanan kikilluwan. ⁶Ad chingngor-un isù kinga wi narpu ta iningkawan na opati isù aangheles, wi anana, “Maingkin annay luta, ad na nginan na osay kiluy finayu, pasar na labfu ta osay padcha, wi isun akon nginan na turuy kiluy kaaw. Ngim achi pu ngumatum nginan na fayas ya lanog.”

⁷Sachi ad inobfad akon Pannilun miyapati taod, ad chingngor-u kon kingan na sachin miyapati parsuwa wi anana, “Waynu!” ⁸Ad innilà akon lummosway osay afayu wi na chutchutna, isù kummukupas na purawna, ad na ngachan na nangaabfayu, Otoy. Ad nitun-ud na sachin nangachanan à Hades wi ingkawan na natoy. Ad naadchanchà karobfongan wi mamatoj ta nan-apatan na takud asnay luta wi na màwaana, mapatoy ta kufat na uchum, ya matoy na uchum à ingki, ya matoy na uchum à sakit, ya patoyon na tanan wi animar na uchum.

⁹Sachi ad, inobfad na Pannilun miyalimay taod, ad innilà na chukun na altar wi mampùwapùwancha ta michatun an Apudyus. Ad innilà na alichodwan chachi takuy napatoy kapu ta nangiwarawakancha ta ukud Apudyus ya nanistikuwancha ta katuttuwaana. ¹⁰Ad impoawcha anani, “Siay Apudyus wi Mannakafalin, wi maid pu miyisuwan na kinafarum ya mapipiyyar wi mangwa ta imfakam, annan sarudsuchonni sia. Siyan maanun manguisam ta takud asnay luta wi foon pù mamati, wi manusam an chicha kapu ta namatoyanchan chiani?” ¹¹Sachi ad, naadchancha losan à mamputilà à luput, ad imfakan Apudyus ta manillongcha yan ingkanà man-od-ochas losan na mapatoy wi fufurunchay mansilfi kon Apudyus, wi isun akon napatoyancha.

¹²Sachi ad inobfad akon Pannilun miyanomi taod. Ad nanità napigsa, ya ngummitit na init wi isun na angititani luput. Ya chummaraag akon furan wi isù acharaag na chara. ¹³Ad na losani fituwon, nayakayagcha wi maodchag ta luta wi isun na mayakayakan na fungan na imong nu mafali. ¹⁴Ad na langit, naumas wi isun na maruutan na papil. Ya losani filfilig ya lutay nangkawa ta fayfay, naatuncha losan ta sikuchi ikawcha.

¹⁵Sachi ad ummawid na atakutaku wi nitapi kon aaliali ya losani turay ta arutaruta ya uray akon losani ap-apun na asurhasurchachu ya losanifafaknang, ya uray chachi ooschor ya chachi nasaachan ya chachi maid pu saadcha. Losancha ummawid wi ummoycha ta filfilig nantaru ta lidliyang ya chopchopras. ¹⁶Ad pin-awanchan filfilig ya chopchopras wi iningkawancha, wi anancha, “Mat-ob-ayuy filfilig ya chopchopras

ta matab-unan-ani ta achi chiani kuma ilan ta sachì tumutùchuy Alid langit, ya achini pu kuma malinan manusaan na sachì Pannilu an chiani! ¹⁷Tan annay chumatong na amochi umog-otancha. Ad sanan manusaancha ta atakutakud asnay luta, wi maid osà makailigtas.”

Na 144,000 Wi Kanà Israel

7 ¹Narpas pun losan chachi, innilà akon opati aangheles wi sumisiad ta opati chugyun na luta. Ad totoppaponchan fidfid ta achi pu mafudfuchan na uray sinumani lukar ad asnay luta ya fayfay ya uray sinuy karasi wi ayu. ²Chichan aangheles wi piniyar Apudyus à mannakafalini manyam-an ta luta ya fayfay.

Ad iningkaw akon osay anghel wi innilà wi narpu ta sumingitan na init, wi inoognanan markan na natatakuy Apudyus. Ad nampoaw ta chachi opati aangheles, ³wi anana, “Achiyu yam-anon na luta ya fayfay ya im-imong ingkanà mamarkaan na ichay na losani mansilfin Apudyus.” ⁴Ad chingngor-u kon filang na chachi namarkaan na ichaycha, ad ummoychà 144,000 wi narpucha losan ta kanà na chachi simpuru ya chuway anà Israel. ⁵⁻⁸Tan ummoy à simpuru ya chuway lifun namarkaan ta waschi osay apuun na chachi simpuru ya chuway kanà Israel. Siyan simpuru ya chuway lifun namarkaan ta kanà Juda, ya uray akon kanà Ruben ya kanà ako Gad ya Aser, Neftali, Manases, Simeon, Levi, Isacar, Zabulon, Jose ya Benjamin.

Na Ad-adchuwanì Achi Pu Mafilang

⁹Sachi ad asinà nantollong ad innilà na ad-adchuwanì taku wi maid pu makafilang ta kaachucha! Maid ako achicha narpawan, wi wachawad na narpu ta losani apuupuun na taku ta arutaruta ya ailiili wi awad na losani karasin na ug-ugkud. Ad losancha summisiad ta sangwanan na sachì tumutùchuy Ali ya sachì Pannilu, wi nasilupancha losan à mamputilà ya nanangchoncha losan à pingin na iyug à manayawanchan chicha. ¹⁰Ad chinakorchan kingacha losan wi anancha, “Ta machaychayaw à Apudyustau, wi tumutùchuy Alitau, ya sachì Pannilu, tan maid uchum à nanaraknib an chitau nu achi afus à chicha.”

¹¹Sachi ad na losani aangheles, naag-agssadcha linìwos na tumutùchuy Ali ya chachi mangipangpangu ya chachi opati isù aangheles, ad nampalintumongcha losan wi manayaw akon Apudyus, ¹²wi anancha, “Annayan katuttuaan! Siay Apudyus, karobfongam wi machaychayaw tan sian angatuan ya karaingen, ya anna kon mannakafalinnu tan maid achi pu mafalin an sia. Siyan manyaman-anin sia ya chaychayawonni sià ing-ingkana! Amen!”

¹³Sachi ad anan na osa an saon ta chachi mangipangpangu wi nansarudsud, “Akammum nu sinun chachi nasilupan à mamputilà, ya nu sinun narpwancha?”

¹⁴ Ad summongfatà, “Maid akammù, Apu, ngim akammum.”

Ad anana kon saon, “Chichan takuy namati wi naparpalikatan ad luta. Ad sinàsaanchan luputcha ta charan na sachì Pannilu, wi siyan miyalig à naurasan na fasurcha. ¹⁵ Ad sachin awachancha ta sangwanan Apudyus wi tumutùchuy Ali, wi mansilfin siya ta Templona ta pinadcha ya linafi. Ad à Apudyus wi tumutùchuy Ali, kanayun iingkaw an chicha. ¹⁶ Ad achicha pu mafitfitil à ing-ingkana, ya maid pu ko mauwawancha, ya achicha pu asin mainitan ya malingtan. ¹⁷ Tan na sachì Pannilu wi ingkaw ta tumutùchuwan na Ali, siyan isù pastorchia wi mangayyuwan an chicha, ad siyan mangipuyut an chicha ta ikaw na mainum wi chagsi wi mangatod ta mannaynayuni fiyag. Ad punasan ako Apudyus na losani luwacha ta maid asincha sumauyan.”

Na Naobfachan Na Miyapituy Taod Na Sachi Naruruuti Papil

8 ¹Na nangobfachan na Pannilu ta miyapituy taod na sachì naruruuti papil, kumminò na losani ingkaw ad langit ta umoy à kogwan na osay uras. ²Sachi ad innilà na pituy aangheles wi sumisiad ta sangwanan Apudyus, ad naadchancha nasin-ossà pupu.

³Sachi ad chummatong akon osay anghel wi nanangchon ta chuyug wi falituk wi maigkaan na fangfanguy insenso. Ad ummoy summiad ta sangwanan na finalituk wi altar wi awad ta sangwanan na tumutùchuwan na Ali. Ad naatod an siyan achuy insenso à ichokana ta luwarun na losani takun Apudyus, à ichatunna ta altar. ⁴Ad na asuk na nap-u wi insenso, nilauk ta luwarun na takun Apudyus ad ngummatu losan wi narpu ta sachì inoognan na anghel wi summisiad ta sangwanan Apudyus.

⁵Sachi ad pinnun na sachì anghel na chuyug à fara wi innarana ta altar, ad inwakawagnad asnay luta. Ad nangichur, ya nangilailat ya nanita.

Na Pituy Pupu

⁶Sachi ad, chachi pituy aangheles, nansakanacha wi mangipakinga ta pupucha.

⁷Sachi ad, impakingan na ummunay anghel na pupuna, ad nauchanan na lutà chararu ya apuy wi nacharaan. Ad naskob na nan-atluwan na annay luta ya nan-atluwan na losani imong wi nitapi kon losani achi pu naranguy charus.

⁸Sachi ad impakingan na miyagway anghel na pupuna, ad iningkaw na isù chakorani filig wi kumilakilab wi nitop-ar ta fayfay. Ad na nan-atluwan na fayfay, namfarfalin chara. ⁹Ad natoy na nan-atluwan na losani ingkaw ta fayfay, ya nilumnod akon nan-atluwan na losani papur ta fayfay.

¹⁰Sachi ad impakingan na miyatluy anghel na pupuna, ad naodchag na osay chakor wi fituwon wi kummilakilab, wi isù pinatud, ad nipsisuk ta nan-atluwan na losani chawwang ya chagsi ta luta. ¹¹Na sachí fituwon, nangachanan à “Paitan.” Ad pinaitanan losani chanum wi nipsisukana, ad natoy na achuy taku ta nanginumancha ta sachí pummaiti chanum.

¹²Sachi ad impakingan akon miyapati anghel na pupuna, ad naabchoy na nan-atluwan na init ya nan-atluwan na furan ya uray nan-atluwan na losani fituwon. Siyan namfalin pangot na nan-atluwan na padcha ya maid pu ko sorag ta nan-atluwan na lafi.

¹³Sachi ad innilà akon osay manitit wi tumattattayap, ad impoawna anani, “Kakkaasin losani takuy foon pù mamati wi ingkaw ta luta ta mamupuwán chachi turuy aangheles wi nanganungus!”

9 ¹Sachi ad impakingan akon miyalimay anghel na pupuna, ad innilà na osay anghel wi isù fituwon wi narpud langit wi naodchag ta luta. Ad naatod an siyan turfi na onob na sachí fitu wi maid pagpag na acharomna. ²Ad inib-atnan sachí fitu, ad lummoswan amoche asuk wi isun na asuk na chakor wi sokob, ad fummulingot na luta tan sinar-iwan na amoche asuk na init.

³Sachi ad, iningkaw akon illoswan na sachí asuk, wi isù chuchun wi sinum-op ta luta, ad naadchanchà karobfongan wi umtob à isun na otob na kayyaman. ⁴Ad nifakan chicha wi achicha an-anuwon na charus ya ay-ayu ya uray sinumani mura, ta siya kay obfanchan takuy maid markan Apudyus ta ichaycha. ⁵Ngim foon pù naparufusan na chachi chuchun wi mangtoy ta taku, ta palikatancha kay chicha ta unog na limay furan, wi na sikab na maparpalikatancha, isun na obfan na kayyaman. ⁶Ad na sachí limay furan, anapon na takun matayancha, ngim achicha pu makàwa, tan uray pionchay matoy, achicha pu maparufusan.

⁷Na itchuran na chachi chuchun, isuchà afayu wi nisasagkana wi umoy makakufat. Ya isù nampayunguscha kò falituk wi koronan na ali. Ad na fosarcha, isù fosar na taku. ⁸Ad na fuìucha ko, anchu wi isun na fuù na fufai. Ad nafafacha, isù fafan na layon. ⁹Ad na far-uungcha, natab-unan à isù aka wi manapar an chicha. Ad nu tumayapcha, umasaasacha wi isun na umasaan na achuy kalisa wi itodtodchà na afayuy umoy makakufat. ¹⁰Ad naipusancha ko ya nasiłochanchà isun na saung na kayyaman. Ad na ipuscha kon ingkawan na karobfonganchay mamparpalikat ta takù limay furan.

¹¹Ya awad akon alichay mangituray an chicha, wi siyan sachí anghel wi nginfantay ta sachí fitu wi maid pagpag na acharomna. Na ngachanna ta ukud na Hebreo, Abaddon, ad ta ukud na Griego, Apolion, wi na miningna, “Manyayam-an.”

¹²Sachin napasamakan na chamuy kaog-ogyati likat, ngim awad akon chuway chaan pù chumatong.

¹³Sachi ad impakingan akon miyanomi anghel na pupuna, ad chingngor-u kon kinga wi isù narpu ta opati chugyun na sachin altar wi falituk wi ingkaw ta sangwanan Apudyus. ¹⁴Ad na sachin kinga, imfakana ta sachin miyanomi anghel wi nanangchon ta pupu, “Obfachom na chachi opati aangheles wi nafafarud ta ikaw na chakor wi chawwang wi Eufrates!”

¹⁵Sachi ad naobfad na sachin opati aangheles, wi nisasagkanacha wi nanguullay ta sachin mismuy uras ya padcha ya furan ya tawon ta patoyonchan nan-atluwan na losani takud asnay luta.

¹⁶Ad nipaila kon saon na susurchachuy naab-afayuwan, ad nifakan saon na filangcha wi ummoychà chuwangkasut wi milyun. ¹⁷Ad amasnan nangil-à ta chachi naab-afayuwan. Nagtapan na far-uungcha isù aka, wi isun na faran na apuy, ya fatuy ananchay safiro, ya asupli na mail-ana. Ad na urun na afayucha, isù urun na layon, ya lumosloswa ta tupòchan apuy ya asuk ya kumilakilab wi asupli. ¹⁸Ad kapu ta chachi turuy karasi wi lummoswa ta tupò na afayu, siyan nangtoy ta nan-atluwan na losani takud asnay luta. ¹⁹Tan na karobfongan na chachi afayu wi umtoy, iningkaw ta tupòcha ya uray ipuscha, wi na ipuscha, isù urog wi nauruwan wi mangtob ta taku.

²⁰Ngim chachi nar-usani takuy foon pù napatoy ta amaschi, issiyay achicha pu iwarang na lawingi oy-oyyooncha, tan foon pù inwarangchay manayaw ta aran ya sinumani sinan-apudyus wi ing-ingwacha ta falituk ya pilak ya kambang ya fatu ya ayu, wi achi pu makaila ya makachongor ya makachadcharan. ²¹Ad na anchinan taku, foon pu kò imfafawichan pummatoyancha ya nanchawaancha ya nansarumangkaancha, ya nan-akawancha ya linurukuchay mipangkop ta lallarai ya fubfufai, tan inturuturuycha.

Na Kàiti Papil Wi Inoognan Na Osay Anghel

10 ¹Sachi ad, innilà akon osay anghel wi oschoran wi nan-osog wi narpud langit wi nalilibfuwan ya nampayungus à afungar. Ad na fosarna, isù init na silingna, ad na ikina, isù natutuud wi kilab na apuy. ²Ad inoognana kon kagkàiti papil wi naiib-at. Ad kinuschana ta chiwawani ikinan fayfay ya kinuschana ta chuwiki wi ikinan luta. ³Ad nampoaw à chakoran, wi isù ngorngor na layon. Ad summongfat na pituy ichur. ⁴Ad narpas pun na kichuur na ichur, ilukì kuma wi mangiyug-is ta imfakacha. Ngim na sachin, chingngor-un osay kummingad langit wi mangipalit, anana, “Achim iyug-is na sachin kingan na pituy ichur tan achi pu mipaakkammuchi.”

⁵Sachi ad, na anghel wi innilà wi nansasakkakang summisiad ta fayfay ya luta, intay-agnan imanay chiwawan ⁶wi nangisapatan Apudyus wi matatakù ing-ingkana, ya siyan nangwa ta langit ya luta ya uray

fayfay, ya losani ingkaw an chicha. Ad insapatan na anghel wi anana, “Maid asin mauray, tan chanchanin màwaana, ⁷tan na mamupuwān na miyapituy anghel, sachin mangamputan Apudyus ta losani chaan pù maakammuwān wi puranuna, wi sachin imfakana ta chachi profetas wi nansilfin siya ta sin-arkawan.”

⁸Sachi ad asin kummingan sachin man-ukud ad langit, ad ananan saon wi, “Ing-a aran na sachin kagkàiti papil wi naiib-at wi oognan na sachin anghel wi nansasakkakang ta fayfay ya luta.”

⁹Siyán ummoy-u ta sachin anghel chinawat na sachin papil, ad ananan saon, “Annaya, aram ad inannu. Maisan ta tupònu wi isù chilu, ngim pasikafonan fuwangnu.”

¹⁰Ad innarà na sachin kagkàiti papil wi inoognana ad innan-u. Ad tuttuway maisan ta tupònu wi isù chilu. Ngim inùmun-u pun, pinasikabnán fuwang-u.

¹¹Sachi ad nifakan saon wi, “Masapur wi ipaakammū akon imfakan Apudyus wi màwa ta losani turay ya losani taku ta ailiili wi mansabsafalin ukudcha.”

Na Chuway Tistikun Apudyus

11 ¹Sachi ad, naatod an saon na osay paraisong wi isù sur-ud, ad anan na sachin nangatod an saon wi, “Ing-a isongon na Templon Apudyus wi mitapi kon altar. Ad filangom akon takuschi wi manaychayaw an siya ta Templo. ²Ngim achim itapi isongon na lasin na Templo tan sachin isù nipurang ta chachi takuy foon pù takun Apudyus. Ad miparufuschay mangsod ta sachin naapudyusani ili wi Jerusalem ta unog na opatpuru ya chuway furan. ³Ngim na sachin timpuy 1,260 wi padcha, ifaun-un chuway tistikù wi umoy mangipaakammu ta pion Apudyus wi paakammu. Ad na maam-amchan na somsomòcha kapu ta fasfasur na taku, mansisillupchà saku.”

⁴Na chuway tistiku, chichan miyalikan na sachin chuway ayuy olivo ya chuway silaw, wi imfakafakan na profetas ta awi, wi awad ta sangwanan Apudyus wi Apun na losani luta. ⁵Ad nu awad mangipachas wi mangan-anun chicha, lumoswan apuy ta tupòcha wi mam-un chicha, ad siyan matayan na sinumani mangipachas wi mangan-anun chicha. ⁶Ad awad akon karobfongancha wi mamagpag ta uchan ta achi pu umud-uchan ta unog na mangipagngorancha ta ukud Apudyus. Ya isun akon losani chanum, tan karobfongancha koy mamfarfalinon na chanum à chara. Ya karobfongancha wi mamalikat ta taku ta uray sinumani likat wi insikun ta pioncha.

⁷Ngim nu marpas na mangipagngorancha ta ipagngorcha, sachin lomoswaan na isag kaog-ogyat wi isù atap wi animar wi marpu ta sachin fituy maid pagpag na acharomna, ad kufatonà chicha. Ad afakonà chicha

ad pinatoyna chicha. ⁸ Ad na lachagcha, mifafannat ta arsan na sachí chakor wi ili wi nilansaan na Apucha. Na mangiyalikancha ta sachí ili, isù Sodoma winnu Egípto, kapu ta lawingi nànàwa ta sachí ili. ⁹ Ad umoy à turuy padcha ya kogwan mamufuyaan na taku ta lachagcha wi achicha pu parufusan na milobnancha. Siyan maid achi namuyà takuy marpu ta ailiili ta arutaruta ya losani karasi wi ug-ugkud an chicha. ¹⁰ Ad maragsakan na takuy foon pù mamatid asnay luta ta natayan na chachi chuwa. Siyan mallagragsakcha ya man-asiatodchà atodcha kapu ta amochi lagsakcha ta natayancha, tan na chachi chuwa, profetas Apudyus wi isagcha nu pinalikatan na takud asnay luta.

¹¹ Ngim lumaus pun na turuy padcha ya kogwa ta sachí, asin Apudyus takuwon à chicha ad fumangoncha ad maid miyisuwan na ogyat na chachi mamufuya. ¹² Ad na sachí, awad na chongron na chachi chuwa, wi chakor wi kinga wi marpud langit, ad ananan chicha, “Wayyusna!” Ad na mangiil-an na losani afusurcha, mipangatucha ta lifuud langit. ¹³ Ad na sachí ko, machanità napigsa ad mayam-an na man-asimpuruwan na sachí ili, ad matoy na pitunlifuy taku. Ad na uchumi takuy mafun-an, isagcha umogyat siyan chayawonchan kinangatun Apudyus ad langit.

¹⁴ Ad amaschin màwaan na miyagway kaog-ogyati likat. Ngim sumarunun miyatlu!

Na Miyapituy Pupu

¹⁵ Narpas pun losan chachi, impakingan na miyapituy anghel na pupuna, ad chingngor-un achuy kummingà chakoran ad langit wi anancha, “Manipud ta sana, maid uchum à manturay ta losani taku nu achi afus na Aputauy Apudyus ya sachí impaalinalad asnay luta wi Cristu, ad siyan manturay à ing-ingkana!” ¹⁶ Ad na chachi chuwampuru ya opati mangipangpangu wi tumutùchu ta sangwanan Apudyus, nampalintumongcha losan wi manaychayaw an siya, ¹⁷ wi anancha,

“Apuni wi Apudyus wi Mannakafalin,
wi iniingkaw uray ta chamchamun na sinuman
ya uray ta sana ya à ing-ingkana,
manyaman-anin sia tan impailam na mannakafalinnu
ad illukim wi manturay!

¹⁸ Ad maid pu miyisuwan na og-ot
na chachi foon pù takum
tan annay chinumtong na manusam an chicha,
wi siya kon manguisam ta natoy.

Ad chinumtong akon manachailam
ta losani manachail ad asnay luta
kapu ta kinarawingcha!

Ad sana kon mangunkunaam ta losani nansilfin sia,

wi profetasnu,
 ya losan akoy takum wi nangiyafain an sia,
 uray chachi nafafa ya nan-angatu.”

¹⁹Sachi ad innilà wi naanib-at na Templon Apudyus ad langit, ad mamàilan kasun wi naigkaan na chachi niyug-isan na turag Apudyus ta awi. Na sachí koy timpu, nangilailat ya nangichur-ichur à chakor, ya nanita ko, ad ummúchan à chararu.

Na Fufai Ya Kaog-ogyati Dragon

12 ¹Sachi ad iningkaw na nipailad langit wi isag kaskaschaaw wi singyar. Iningkaw na osay fufai wi summisiad ta furan, ya nasiclupan à isun na siling na init, ya nampayungus à korona à simpuru ya chuway fituwon. ²Akin-annaon à siya, siyan nantuking ta amochi sikab na mangkumutana.

³Sachi ad iningkaw na nipaila ta langit wi osay kaskaschaawi singyar wi na sachí, kaog-ogyati dragon wi mancharaag na long-agna ya pitun uruna ya simpurun sàkudna. Ya losani uruna, napayungusan à koronan na ali. ⁴Ad inabchoyna ipusnan nan-atluwan na losani fituwon ta langit ad siyan nayagyakancha ta luta. Ad ummoy ta sangwanan na sachí fufai wi akin-annaon, ta ananon anàna nu fumùnag.

⁵Ngim ummanà pun na fufai, wi larain inyanàna, naiyawid naiyoy an Apudyus ta tumutùchuwana, tan siyan mangituray ta arutarutà tapin na padcha, wi istriktun pinagturayna. ⁶Ad na sachí fufai, ummawid ta filig wi ummoy ta lukar wi insasagkhanan Apudyus à mantaruwana, wi mangayyuwananan siyà unog na 1,260 wi padcha.

⁷Sachi ad finumtak na kufat ad langit. Ad à Miguel wi ap-apun na aangheles, impanganan uchumi aangheles wi mangufat ta sachí dragon. Ad na sachí dragon ya aanghelesna ko, nakakufatchan chicha, ⁸ngim naafakcha losan, siyan maid pu karobfonganchay ingkaw ad langit.

⁹Siyan niparyaw na sachí kaog-ogyati dragon, ya nifallucha losan ta aanghelesnad asnay luta. Na sachí dragon, siyan urog ta awi wi ap-apun na aran, wi Satan ako kay, wi siyan nanurtulli ta atakutakud asnay luta.

¹⁰Sachi ad chingngor-un chakor wi kingad langit, wi anana, “Sanan tumuttuwaan na manaraknifan Apudyus ta taku, tan sanan mangipail-ana ta mannakafalinnay manturay! Ya sana kon mangipail-an na sachí imfaunnay Cristu ta karobfongana! Tan naafak na ap-apun na aran ad niparyaw ad langit, wi siyan nangipafasurfasur ta susunudtaun Apudyus ta pinadcha ya linafi. ¹¹Ngim chachi susunudtau, inafakchà siya kapu ta nifufuan na charan na sachí Pannilu, ya kapu ko ta nangistikuwancha ta mipangkop ta sachí Pannilu, uray sachin inyotoycha wi foon pù pinatkanchan fiyagcha. ¹²Siyan losantauy annad asnay langit, lumagsaktau tan niparyaw à Satan! Ngim kakkaasi losan chachi awad

ad luta ya fayfay tan sachin nifalluwan Satan. Ad amod na og-otna tan akammunay ait na timpunay mangwa ta pionay oyyooni lawing.”

¹³Sachi ad wi illasin na dragon wi niparyaw ya nifallu ta luta, chinogchognan sachin fufai wi nangiyàna ta sachin anà wi larai. ¹⁴Ngim na sachin fufai, naadchan à chuwà payà wi isun na payà na chakor wi manitit ta tumayap umawid ta sachin filig wi sachin maayyuwananà unog na turuy tawon ya kogwa, ta foon pù ochasan na sachin urog wi dragon ako kay. ¹⁵Siyán na dragon, inyutanan isù chawwang wi chanum à manlitapna ta manganudna ta sachin fufai. ¹⁶Ngim nafadngan na fufai, tan nantaang na luta ad narun-ug losan na sachin chanum wi narpa ta tupò na dragon.

¹⁷Sachi ad naam-amod na og-ot na dragon ta sachin fufai, wi maid miyisuwan na og-otna, siyan ummoyna kinufat na uchumi an-ananàna, wi chichan losani namtog ta imfakan Apudyus ya nangipapati wi mamangchon ta katuttuwaan wi intudtuchun Jesus. ¹⁸Sachi ad, ummoy na sachin dragon ta tarantag na fayfay umaagsad man-uullay.

Na Kaog-ogyati Animar Wi Narpa Ta Fayfay

13 ¹Sachi ad iningkaw na innilà wi lummoswa ta fayfay wi isag kaog-ogyat wi animar. Pitun uruna ya simpuru kon sàkudna. Ad losani sàkudna, annan koronana, ad na losani ichayna, naug-isan à ngadngachan Apudyus. ²Ad na itchuran na sachin kaog-ogyati animar, isù leopardo. Ad na ikina, isù ikin na bear, ad na tupòna, isù tupò na layon. Ad inadchon na dragon ta sachin animar na mannakafalinna ya manturayana ya chakor wi karobfongana.

³Na osay urun na sachin kaog-ogyati animar, iningkaw na fikadna wi inyatoya, ngim napilatan ad asin nataku. Ad sachin naschaawan na losani takud asnay luta ya sachin kon losancha summurutan an siya. ⁴Ad chinaychayawcha losan na dragon kapu ta nangadchana ta karobfongana ta sachin kaog-ogyati animar. Ad chinaychayawcha kon sachin kaog-ogyati animar wi anancha, “Maid miyisuwan na sanati animar! Maid pu nginlobfong makakufat an siya!”

⁵Ad na sachin kaog-ogyati animar, naparufusan wi tumangsit ya manginsurtun Apudyus, ya naparufusan akoy manturay ta unog na opatpuru ya chuway furan. ⁶Siyán illukinay mangin-insurtun Apudyus ya uray na mipangkop ta ngachanna ya foroynad langit ya losan chachi ingkaw ad aschi. ⁷Ad naparufusan à mangufat ta takun Apudyus à mangafakanan chicha, ad naadchan akò wayana wi mangituray ta losani taku ta ailiili ta arutaruta wi maid mar-usan ta losani mangkarakarasi wi ukud. ⁸Siyán losani takud asnay luta chayawonchà siya, wi naraksig yakán chachi takuy nilistan ngachancha ta nibrun na Panniluy napatoy. Tan nanipud ta chamchamun na sinuman, nar-us nilista ta sachin nibrun

angachangachan na losani maadchan à mannaynayun à mafiyakan an Apudyus.

⁹Masapur chongronyuna, nu naingaan-ayu! ¹⁰Chachi takuy naikasat wi mifarud, mifarudcha met laing! Ad chachi naikasat wi mapatoy à sabli, mapatoychà sabli! Siyan chitauy takun Apudyus, masapur papigsaontaun pammatitau ya an-anusantaun sinumani mapasamak an chitau.

Na Kaog-ogyati Animar Wi Narpu Ta Luta

¹¹Sachi ad iningkaw akon innilà wi osay kaog-ogyati animar wi lummoswa ta luta. Chuwan sàkudna wi isù sàkud na ikaw na pannilu, ngim na kingana, kaog-ogyat wi isù kingan na dragon. ¹²Ad na losani karobfongan na sachì ummunay animar, wachawad ako ta sachì niyagwa, tan siyan isù pinakarong-agna. Ad ipapilitna pachayaw ta losani takud asnay luta na sachì osay animar wi napilatan na fikadna. ¹³Ad na sachì niyagway animar, impailanan mampataag wi kaskaschaaw, tan impaodchagnan apuy wi marpud langit à mangil-an na losani taku. ¹⁴Siyan tinurtulliyanan losani takud asnay luta ta nangwaana ta kaskaschaaw kapu ta karobfongan na sachì ummunay animar. Ad na sachì miyagway animar, nampàwa ta takù sinan-animar à isun na sachì osay animar wi nafikachan ta sabli ngim nataku. ¹⁵Ad imparufus ako Apudyus wi man-angngoson na sachì miyagwa na sachì sinan-animar ta mafalini makakinga ya mafalinnna koy otyon na sinumani foon pù manyaw an siya.

¹⁶Ad ako, na sachì miyagway animar, pinilitnan losani taku wi mamarkaan na ichaycha winnu chiwawani imachà markan na sachì ummunay animar. Siyan namarkaan na losani taku wi nasaachan ya chachi maid saadcha, ya urayfafaknang ya kakapus, ya uray sasannilu ya chachi foon à sasannilu. ¹⁷Tan nu sinun foon pù mamarkaan à ngachan na sachì ummunay animar, winnu numeron na ngachanna, foon à mafalini man-ingina ya mangnginà farangna.

¹⁸Afus chachi nanakmani takù makaawat ta annaya. Siyan nu sinun naraing, ilasinnan miyalikan na sachì numeron na ummunay animar, tan na sachì numero, siya miningnan ngachan na osay taku, wi na numerona, 666.

Na Pannilu Ya Takunay 144,000

14 ¹Sachi ad wi nantollongà, iningkaw na Pannilu wi summisiad ta Filig wi Sion. Ad iningkaw akon niyamung an siya wi takuy 144,000, wi naug-isan na ichaychà ngachan na Pannilu ya ngachan na Amana. ²Ad chingngor-u kon chakorani kinga wi narpud langit wi isù akasaas na lumuyluy-ud wi chanum ya isu kò kichuur na ichur, ngim isu kò kingan na ad-adchuwanì mangkitkitara. ³Ad chachi takuy 144,000,

sinasakungchan sachì tumutùchuy Ali ya chachi opati isù aangheles ya chachi koy mangipangpangu. Ya kankantaonchan adchatuy kanta wi maid uchum à mangakammu nu achi afus chachi 144,000, tan chichan sinubfut na Pannilu ta iningkawanchad luta.

⁴Na anchanay taku, maid tuwa nakafasurancha mipangkop ta fufai, tan chichan takuy mamfaru. Mituntun-udcha ta Pannilu ta sinuy umayana, tan chicha chachi nafayachan na fasurcha wi isù inlasin Apudyus chicha ta uchumi taku ta chichan umunay mamatì, wi isù michatunchan Apudyus ya sachì Pannilu. ⁵Ya maid anu nanturtulliyancha ya maid pu ko mapafasuranchan Apudyus.

Na Impachamag Na Turuy Anghel

⁶Sachi ad, innilà akon osay anghel wi tumattattayap ta ngatu, wi mangiwarawag ta losani taku ta Mamfaruy Chamag wi achi pu mabmabos à ing-ingkana. Ad iwarawagna ta losani karasin na taku ta ailiili ta arutaruta wi mangkarakarasin ukudcha. ⁷Ad chinakornan kingana, “Iyafainyù Apudyus, ya chayawonyun kinangatuna, tan annay chumtong na manguisana ta atakutaku! Siyan chaychayawonyù siya, tan siyan nangwa ta asinchuwan wi uray langit ya luta ya uray akon fayfay ya losani chusì!”

⁸Sachi ad iningkaw akon miyagway anghel wi ummun-unud, wi anana, “Kattoi nayam-an na sachì machamchamag wi ili wi Babilonia à machusaana! Tan chachi takuschi, isù impainumcha ta losani taku na sachì isù mampiyay fayascha, wi sachin miyalikan na nangawisancha ta atakutakuy mangwa ta lawingi ining-ingwacha.”

⁹Sachi ad iningkaw akon miyatluy anghel wi nitun-ud ta chachi chuwa, ad chinakorna kon kinganay anana, “Sinumani manaychayaw ta sachì kaog-ogyati animar ya sachì sinan-animate, ya sinumani impamarkanan ichaycha winnu imana ta ngachanna, ¹⁰sikurachuy ipainum ako Apudyus an chichan paitani fayasnay natasa wi maid laukna, wi sachin miyalikan na amochi og-otna! Tan palikatan Apudyus chicha losan à apuy ya kumilab wi asupli, ad fufuyaon na aangheles Apudyus ya sachì Pannilu. ¹¹Ad na sachì apuy wi mamalikat an chicha, maid pu matayana tan kumilakilab à ing-ingkana wi maid pu miwarangan na asukna. Ad maid purus kumin-an na likatcha tan pinadcha ya linafi wi maliligkatancha, tan chicha chachi nanayaw ta sachì kaog-ogyati animar ya sachì sinan-animate ya chicha kon namarkaan akò ngachan na sachì animar.”

¹²Ngim chiayuy takun Apudyus, wi nanungpar ta imfakana ya mamatì kon Jesus, masapur papigsaonyun pammatiyu ta achiayu maawis, uray sinun mapasamak an chiayu.

¹³Napannos ad, chingngor-u kon kingad langit, ad ananan saon, “Iyug-isnun anchanaya: Manipud ta sana, maragsak na losani mamatin Aputau nu matoycha!”

Ad anan akon Ispiritun Apudyus wi nanachun, “Oo, tuttuwa wi maragsakcha, tan na matayancha sachin man-illongancha ta nalikati iwaarcha, ad sachin kon mangar-ancha ta kunkunan na mamfaruy iningwacha.”

Na Maapitan Na Achi Pu Mamati, Wi Miyalig À Mura Ta Annay Luta

¹⁴ Nantollongà pun, iningkaw na innilà wi putilaani lifuu, ad iningkaw akon tummutùchu ta lafawna wi isù taku wi napayungusan à falituk wi karonan na ali ya nanangchon à tachomani lilit. ¹⁵ Sachin ad innilà akon osay anghel wi lummoswa wi narpu ta sachin Temploid langit, ad pin-awanan sachin tummutùchu ta lafaw na lifuu, “Ikapsnun sanati lilitnu ta kapasom na luta, tan chummatong na ustuy inyàapit, tan isù nar-umi ani na luta!” ¹⁶ Siyan na sachin tummutùchu ta lifuu, inkapasnan lilitna ad inapitna losan na ani na luta.

¹⁷ Sachin ad iningkaw akon innilà wi osay anghel wi lummoswa ko wi narpu ta sachin Temploid langit, ad nanangchon akò tachomani lilit.

¹⁸ Sachin ad lummoswa kon osay anghel wi narpu ta altar, wi sosogkan ta michatun an Apudyus. Na sachin anghel, siyan nginfiyang ta apuy. Ad pin-awana kon sachin osay nanangchon à tachomani lilit, “Làkacham na sanati isù wakar wi mura wi ananchay grapes ta luta tan nar-umcha losan!” ¹⁹ Siyan na sachin anghel, inlakadnan lilitna ta luta ad inaranan losani fungan na grapes, ad pinonponna ta chakor wi astan Apudyus, wi sachin alig na amochi og-otnay manusa ta takud asnay luta. ²⁰ Ad na ikaw na astan na grapes, lasin na ili. Ad chara na lummoswa ta sachin astan, ad linitapnan nasuruk à turungkasut ya chuwampuruy kilometro na aanchuna, wi maagsachan na arofongna.

Na Pituy Aangheles Wi Mangipachas Ta Anungus Na Likat

15 ¹ Sin-aitan ad, iningkaw akon osay nipailad langit wi isag mampataag wi singyar wi màwà tapin na padcha, tan iningkaw na pituy aangheles wi nangchon ta manganungus wi pituy likat wi mipachas ad asnay luta, wi chichan liglikat ta pagpag na manusaan Apudyus ta taku.

² Sachin ad innilà na isù mammusmussiling wi fayfay, wi naaslangan à apuy. Ad innilà akon chachi nangafak ta sachin kaog-ogyati animar kapu ta ummisianchay manayaw an siya ya ta sachin sinan-animar wi issuissuna, wi losancha ko foon à nampamarka ta numeron na ngachanna. Ad ummaagsadcha ta tarantag na fayfay wi nanangchonchà isù kitara wi innadchon Apudyus an chicha. ³ Ad kinankantacha kon kantan Moses wi nansilfin Apudyus ta awi, wi sachin kon kantan na Pannilu. Amasnan kinantacha:

“Siay Apu wi Apudyus wi Mannakafalin,

maid pu miyisawan na losani iningwam
 wi isag kaskaschaaw!
 Siay Alin na losani taku ta arutaruta,
 isag nalimpiw ya pasig tuttuwan losani achawiyam!
⁴ Maid pu achi umogyat an sia ta sana, Apu!
 Ya maid pu ko achi mangipudnu ta kinangatum,
 tan maid pu miyisawan na kinafarum.
 Siyan na losani taku ta arutaruta,
 umalicha losan wi manaychayaw an sia
 tan naawatancha losan wi ustuustun
 losani oy-oyyoom.”

⁵Napannos ad, innilà akoy naib-at na Templod langit, ad mamàilan sachì Kachayawani Kuwartun Apudyus ta charònà. ⁶Sachi ad lummawa chachi pituy aangheles ta sachì Templo wi nanangchon ta chachi pituy liglikat. Ad losancha nasiclupan à putilaan wi pumopor-as, ya nafofod na far-uungchà falituk.

⁷Sachi ad ummoy na osa ta chachi opati isù aangheles ad sinin-ossana inadchon ta chachi pituy aangheles na chuyug wi falituk wi nanapnù ogot Apudyus wi matatakù ing-ingkana. ⁸Ad kapu ta kinafarun Apudyus ya mannakafalinna, losan asuk na charom na Templo, ad maid pu makarnò ingkanà marpas na pituy likat wi ipachas na chachi pituy aangheles.

Na Pituy Chuyug Wi Nanapnù Og-ot Apudyus

16 ¹Napapannos ad, chingngor-u kon chakor wi kinga wi narpu ta Templo wi nan-ukud ta chachi pituy aangheles, anana, “Choowot ing-ayu isiyat ta lutan anchanati likat wi awad ta pituy chuyugyu, wi ogot Apudyus ta taku.”

²Sachi ad ummoy na ummunay anghel insiyat ta lutan sachì iningkaw ta chuyugna. Ad losan chachi namarkaan ta markan na kaogogyati animar ya nanaychayaw ako ta sachì sinan-animar wi isuna, nakakatorcha losan à man-akub wi kakator wi amod na sikabna.

³Sachi ad ummoy akon miyagway anghel insiyat ta fayfay na iningkaw ta chuyugna, ad na sachì chanum namfalin isù charan na natoy, ad na losani man-àachap ta fayfay, natoy.

⁴Sachi ad ummoy akon miyatluy anghel insiyat ta losani chawwang ya chagsi na iningkaw ta chuyugna. Ad namfarfalin na chanum à chara. ⁵Ad na sachì, chingngor-un imfakan na anghel wi nginfiyang ta chanum, wi anana, “Apudyus wi maid pu miyisawan na kinafarum, wi sikuchi iniingkaw ta chamchamun na sinuman ya iingkaw-a kò ing-ingkana, kattoi nalimpiw ya ustuustun pinagchusam ta taku! ⁶Tan pinatoychan chachi takum ya chachi profetasnu wi isu kò insiyatchan characha. Ad sachin mangipainumam an chicha ta chara ta sanà sufalit

na iningwacha!” ⁷Sachi ad chingngor-u kon summongfat wi narpu ta altar, wi anana, “Oo, Apu, siay Apudyus wi Mannakafalin, ustuustu ya nalimpiw tuwan pinagchusam ta taku!”

⁸Sachi ad ummoy akon miyapati anghel insiyat na iningkaw ta chuyugna ta init. Ad naam-amod pummigsan atungna wi maatungan na taku. ⁹Ad uray nu naatungancha, ar-arwakanchà Apudyus wi mannakafalin ta losani likat, ad foon pù iwarangchay fumasurfasur ya foon pù chayawonchan kinangatun Apudyus.

¹⁰Sachi ad ummoy akon miyalimay anghel insiyat na iningkaw ta chuyugna ta tummutùchuwan na sachin manturay wi kaog-ogyati animar. Ad fummulingot isag na losani iturayana, ad obfan na takun chilacha ta likatcha. ¹¹Ngim maid pu nangifafawi an chicha ta lawingi oy-oyyooncha, ad ar-arwakanchà Apudyus ad langit kapu ta sikab na long-agcha ya kakatorcha.

¹²Sachi ad ummoy akon miyanomi anghel insiyat na iningkaw ta chuyugna ta chakor wi chawwang wi nangachanan à Eufrates. Ad nadchù na sachin chawwang à mamfallasiwan na nan-angatuy ali wi marpu ta sumingitan na init.

¹³Ad sachin nangil-à ta turuy aran wi isù tukak na itchuracha. Na osa, lummoswa ta tupò na sachin dragon, ad na osa, lummoswa ta sachin kaog-ogyati animar, ad na miyatlu, lummoswa ta tupò na sachin sinaprofetas wi pinakarong-ag na sachin animar. ¹⁴Na chachi turuy aran Satan, makàwachà kaskaschaaw, ad umoycha aruson na losani ali ta arutaruta ta losancha kufaton à Apudyus wi Mannakafalin. Ngim na sachin padcha, siyan mangafakan Apudyus ta losani afusurna.

¹⁵⁻¹⁶Na lukar wi nangarusan na chachi aran an chicha, siyan ananchay Armagedon ta Hinebreo wi ukud. Ad sachin mangifag-an Jesu Cristu wi, “Tantanchaakanyun annayay ifakà, tan maid pu apuutanyù mangulinà tan isun na inyòoyyan na man-aakaw wi achi pu maakammuan ad nachanatong! Siyan maragsak na takuy nakasakana wi manguullay an saon, wi isun na nansisillup wi achi pu masusuyop, tan foon pù màchasan wi namfofodchang à mifafainana.”

¹⁷Sachi ad ummoy na miyapituy anghel insiyat na iningkaw ta chuyugna ta poyaaw. Ad iningkaw na chakorani kinga wi narpu ta tummutùchuwan Apudyus ta Templo, wi anana, “Nakangput!” ¹⁸Ad nangilailat ya iningkaw na umatiatiung-ung ya kichuur na ichur, ya amod wi chita wi maid miyisuwanan nanipud ta nàwaan na taku ta annay luta. Maid miyisuwan na apigsana! ¹⁹Ad nan-atlu napotpotlà na nachamchamag wi ili wi Babilonia, ad nachachail losan na chachakkor wi ili ta arutaruta. Ad simsimmò Apudyus ad Babilonia wi nachamchamag wi ili ta nanusaana wi isù impainumnan natasay fayasnay paitan wi maid nafun-an uray sintodtod kapu ta amod wi

og-otna. ²⁰ Ad nilumnod na losani lutay nangkawaon na fayfay, ad nan-un-unapnap na losani filfilig. ²¹ Ad ummuchen à nan-achakkor à chararu wi umoy à limay puruy kilu na achagson na osa, ad naodchagcha ta taku. Ad ar-arwakan na takù Apudyus kapu ta kaog-ogyati chararu ya amod wi likat.

Na Nachamchamag Wi Puta Wi Nangaabfayu Ta Kaog-ogyati Animar

17 ¹Sachi ad ummatam an saon na osa ta chachi pituy aangheles wi nachuychuyukan, ad anana, “Waynu, ta inyà ipaila na manusaan Apudyus ta chachi taku ta ili wi achani ta achuy chawwang, wi miyalig na sachì ili ta fufai wi machamchamag na kinaputana. ² Na sachì fufai, isù insuyopnan losani ali ta annay luta, ad nakafasurcha losan an siya. Ad na losani takuy foon pù mamatid asnay luta, isuchà nasalimong ta nanginumancha ta fayasna wi ipaipainumna.”

³Sachi ad tiningngilà ta Ispiritun Apudyus ad inyoyà ta anghel ta fogfokaw. Ad sachin nangil-à ta osay fufai wi nangaabfayu ta osay manchilaag wi kaog-ogyati animar wi pitun uruna ya simpurun sàkudna. Ad naug-isan losan na long-agnà ngadngachan Apudyus. ⁴ Ad na sachì fufai, nakasilup à silup na ali wi manchilaag ya mallinsi wi natayutayunan à falituk, perlas ya nanginginay fatu wi sumilap. Ad nanangchon à falituk à tasa wi nanapnù afafain wi lisortan na lawingi oy-oyyoona. ⁵ Ad iningkaw na niyug-is ta ichayna wi ngachan wi chaan à maakammuwan na miningna, wi ananay, “Na nachamchamag wi ili wi Babilonia, siyan ina losan na puta ya nallukiyan na losani afafain wi màmàwa ta annay lufung.” ⁶ Ad na nangil-à ta sachì fufai, isù nasalimong ta charan na takun Apudyus wi napatoy kapu ta pammatichan Jesus.

Siyán na nangil-à ta sachì fufai, naschaawà. ⁷ Ad anan na anghel an saon, “Taako maschaaw? Chongrom ta ifakà na miyalikan na sachì fufai ya sachì kaog-ogyati animar wi nangaabfayuwana, wi pitun uruna ya simpurun sàkudna. ⁸ Na sachì kaog-ogyati animar, asififiyang ta annay luta ta sin-arkawan ngim maid ta sana. Ngim asin lumoswà tapin na padcha ta sachì fitu wi maid pagpag na acharomna. Ad losan na taku ta annay luta wi foon à nilistan ngachanna ta sachì nibru nanipud ta chamchamun na annay luta wi nilistaan na losani maadchan à mannaynayun à fiyag, maschaawchay mangila ta sachì kaog-ogyati animar nu asin lumoswa. Ngim na lumoswaana, mifallu ko ad infierno.

⁹“Isù nalikatnà maawatan, ta ikad na nanakmani takuy makaawat ta anna. Tan na pituy uru, miyalig ta pituy filig wi tummutùchuwan na sachì fufai, ya miyalig ako ta pituy ali: ¹⁰ na lima an chicha, napapog na nanturayancha, ad na miyanom, siyan turay ta sana. Ad na miyapitu, chaan à chumtong na manturayana. Ngim nu chumtong, sin-akitan yakán manturayana. ¹¹ Ad na sachì kaog-ogyati animar wi iningkaw ta sin-

arkawan ngim maid ta sana, siyan miyawaruy Ali wi misukat ta chachi pitu, ad mifallu.

¹² “Ad na miyalikan na simpuruy sàkud, chichan simpuruy ali wi chaan à chumtong na manturayancha. Ngim nu chumtong na karobfonganchay manturay, makaturaycha ta sachì kaog-ogyati animar à sin-aitan wi isun yakà osay uras na manturayancha. ¹³ Ngim na chachi simpuru, man-iisun puntilyacha ad impurangchan mannakafalincha ya lobfongcha ta sachì animar, ¹⁴ ta man-ossaancha wi mangufat ta sachì Pannilu. Ngim na Pannilu, ya chachi napipiyyar wi chinutukanà mamatin siya, afakoncha chicha tan siyan Apun na losani ap-apu ya Alin na losani ali.”

¹⁵ Sachì ad anan akon sachì anghel an saon, “Na miyalikan na innilami achuy chawwang wi achani ta tummutùchuwan na sachì puta, chichan aapuapuun na taku ta ailiili ya arutaruta wi wachawad na losani karasin na ug-ugkud. ¹⁶ Ad na chachi innilam wi simpuruy sàkud ya kaog-ogyati animar, chumtong na mallawingancha ta sachì fufai, ad losancha aran na ùuwana ya fochangancha kò siya. Ad anoncha kon fokas na long-agna ad sogkonchan mafun-an. ¹⁷ Na mangwaancha losan ta amaschi, tan Apudyus na nangipaspasmò ta nantitimpuyukan na sachì simpuru ya nangipurangancha ta mannakafalincha ta sachì kaog-ogyati animar à manturay, ta mituruy na puranun Apudyus ya tumuttuwaan na losani imfakana wi màwa.

¹⁸ “Na miyalikan na sachì fufai wi innilam, siyan machamchamag wi ili wi mangitray ta losani turay ta annay luta.”

Na Mayam-anan Na Ilid Babilonia

18 ¹Narpas ad na sachì, innilà na osay anghel wi nan-osog wi narpud langit. Ad chakor na karobfongana ya malinangan na luta ta silingna. ²Ad impoawna anani, “Nachusa ta sana ya losan nayaman na sachì machamchamag wi ilid Babilonia! Ad namfalini iniliyan na aran ya nanùfutan akon losani kaisaw wi sissiwit wi larawwingontau. ³Tan na sachì ili, inawisnan losani taku ta ailiilid asnay lutà sumurut ta kinarawingna, tan isù impainumnan paitani fayasna ta losani takù masalimngancha losan. Ad na aaliali ta luta, isù nakachagchakaschan siya tan sinurutchan achawiyana wi foon pù achawiyana Apudyus. Ad na losani manlakrakud asnay luta, fummaknangcha tan naamiamin na nanginginay lakucha wi usarona ta lumagsakanay lawing!”

⁴Sachi ad, iningkaw akon kinga wi chingnor-u wi narpud langit, wi anana,

“Chiayuy takù, lumayaw-ayu ta sanati ili
ta achiayu makafasur ta fasurna
ya achiayu ko mitapi ta machusaana!

⁵ Tan na fasurna, isun na angatun na langit

na naponponancha.

Ad achin pu Apudyus maliwatan
na kinarawing na oy-oyyoona.

⁶ Siyan na màwan siya,

manchublin losani ining-ingwanay lawing ta uchum
à sufalit na iningwana.

Ad na sachí paitani impainumna ta uchum,
manchubli kon paitnà mipainum akon siya.

⁷ Tan na isag wi nallamram-ayana

ya nangipachayawana ta long-agna,
siya kon isun na manlikatana ya manchomchomana.

Tan anana ta somsomòna,

'Isuwà à turay wi foon à nafaru,
siyan maid mipadpachas an saon
à isun na likat na mafaru!'

⁸ Ad kapu ta sachí, machigsan wi mipachas

na akarakarasi wi likat an siya,
tan masakit, manomchom ya maingki,
ya maskob ako, tan à Apudyus wi manusan siya,
mannakafalini Apu."

⁹ Sachi ad losani turay ta annay luta wi nakachagchakas ya nakaramram-ay ta sachí ili wi niyalig ta puta, ifilancha ya ichomchomcha nu ilanchan asuk na maskofana. ¹⁰ Ad umaadchayangcha tan umogyatchà mitapicha ta machusaana. Ad anancha, "Aynga! Kakkaasin sachí nachamchamag wi ili wi Babilonia! Osay uras yakan nachusaana ad maid!"

¹¹ Ad uray ako chachi mallakraku ta arutaruta, ifilancha ya ichomchomchan sachí ili, tan maid mangngina ta lakucha. ¹² Siyan maid mangngina ta lakuchay falituk ancha kantar ya nanginginay fatu ya perlas. Ya maid ako mangngina ta nanginginay karasin na luput wi man-achilaag, man-aputilà ya man-alinsi. Ya maid ako mangngina ta man-afafaru ya man-afafangu wi ayu, ya sinumaní nàwa ta saung na elefante ya nan-anganay ayu ya kambang ya aka ya man-afafaruy fatu.

¹³ Ad maid ako mangngina ta lakuchay akarakarasi wi mampafangu ta maan ya isun chachi fangfangu wi insenso, mirra ya uchum. Maid ako mangngina ta lakuchay fayas, lanog, arina, pakoy ancha faka, pannilu, afayu ya kalisa. Ya maid ako mangngina ta ilakuchay taku wi inginachà mansanilu. ¹⁴ Ad chachi mallakraku, anancha ta sachí ili, "Losan chachi mamfaruy fanfanag wi patpatkam à mallamram-ayam, mummaid. Ya losani kinafaknangnu ya kinafarum, mummaid ako. Ad uray nu sinun oyyoom, foon à makaulià ing-ingkana!"

¹⁵ Ad chachi mallakraku wi fummaknang ta sachí ili, umaadchayangcha tan umogyatchà mitaurungcha ta kachusaana. Asiifilcha ya

asichochomchomcha anani,¹⁶ “Aynga! Kakkaasin sachí nachamchamag wi ili, tan isù fufai wi nansilup à kanginaani luput wi mallilinsi ya manchilaag wi natayutayunan à falituk, perlas ya nanginginay fatu!
¹⁷ Ngim afus yakan osay uras ad mummaid na losani kinafaknangna!”

Uray chachi mammanihu ta papur ya chachi man-iiwaar ta papur ya uray losani man-iiwaar ta fayfay, ya chachi mampififiyasi ta papur, ummaadchayangcha losan¹⁸ wi man-oottap ta asuk na naskofana. Ad impoawcha, “Maid pu miyiswan na sachí ili!”¹⁹ Ad chinapuranchan urucha ta amochi somsomòcha ta sachí ili, ad nan-ifilcha ya nanomchomcha anani, “Aynga! Kakkaasin sachí nachamchamag wi ili, tan na kinafaknangna, siyan fummaknangan na losani annan papurna! Ad afus yakan osay uras ad mummaid losan na kinafaknangna!”

²⁰ Ngim à chiayuy awad ad langit, lumagsak-ayu ta nayam-anana! Ya uray chiayuy takun Apudyus ya apostolesna ya profetasna, lumagsak-ayu losan tan imfaros Apudyus na ining-ingwanan chiayu ta nanusaana ta sachí ili!

²¹ Ad iningkaw na osay oschorani anghel wi nan-itang-oynan chakorani fatu ad intop-arna ta fayfay, ad anana, “Amaschin màwa ta anchi machamchamag wi ili wi Babilonia ta mayam-anana. Ad maid asin mail-il-anà ing-ingkana. ²² Ad na sachí ili, maid asincha mangmangngoran à mangkankanta, mangitkitara ya chachi manungali ya managkaypu ya kingan na pupu! Ya maid ako isun na mamfosar ya man-afor, ya maid asin magngor à kingan na kiskisan! ²³ Ya maid asin mailà lawag na silaw ya maid ako asin magngor à kingan na mallaragsak wi mangkasar. Ad uray chachi nallakraku ta sachí ili, wi chichan afaknangan ta annay luta, sachí kon nachusaancha! Ya sachí kon nachusaan na losani isun na mansasarumangka tan linukupchan losani taku ta annay luta!”

²⁴ Nachusan sachí ili wi Babilonia tan siyan namatayancha ta profetas Apudyus ya uchumi takuna, ya uray sinumani takuy napatoy ta annay luta, napatoycha losan kapu ta sachí ili.

19 ¹ Sachi ad chingngor-un ngonot wi isù kingan na ad-adchuwani takud langit, wi anancha, “Chayawontaù Apudyus! Siyan afusi makasarakanib ta taku ya siyan mannakafalin ya afaruwan!
² Katuttuwaan ya nalimpwi na pinagkuisna ta taku! Chinusanan sachí fufai wi nachamchamag na kinaputana, wi siyan nangawis ta losani taku ta annay lutà mitapi makafasur ta fasurna. Ya chinusanà siya kapu ta namatoyana ta chachi nansilfin Apudyus.”
³ Ad anancha koy nangipoaw, “Chayawontaù Apudyus, tan kumilakilab ya umasuasuk à ing-ingkana na sachí nachamchamag wi ili à kachusaana!”
⁴ Ad na chuwampuru ya opati mangipangpangu ya chachi opati parsuwa, nampalintumongcha losani manayaw an Apudyus wi tumutùchu wi manturay, ad anancha, “Oo, tuttuwa! Ta afus à Apudyus à machaychayaw!”

Na Mangkasaran Na Pannilu

⁵Sachi ad chingngor-u kon kinga wi narpu ta tummutùchuwan Apudyus, wi anana, “Chaychayawonyun Apudyustau, losan-ayuy mansilfin siya ya losani mangiyafain an siya, uray nangatu winnu nafafa, chayawonyu losan à Apudyus!”

⁶Ad na sachí, chingngor-u kon ngonot wi isù kingan na ad-adchuwaní taku, wi isù akasaas na lumuyluy-ud wi chanum ya isù kichuur na ichur, wi anancha, “Chaychayawontaù Apudyus, tan siyan afus à mannakafalin wi Aputau ya manturay ta losan! ⁷Maay-ayatantau ya maragsaktau ya chaychayawontaù siya wi angatuwan! Tan na sana, inumchas na timpuy mangkasaran na Pannilu, ya nansasagkana kon sachí asaw-oná, ⁸tan naatod an siyan farfaruy silup wi putilaan wi maid purus mansana.” (Na miyalikan na sachí silup, chachi mamfaruy ining-ingwan na takun Apudyus.)

⁹Sachi ad anan na anghel an saon, “Iyug-isnun annaya: Maragsak na chachi naimfitar ta kasar na Pannilu.” Ad anana ko, “Katuttuwaanchi tan mismuy imfakan Apudyus.”

¹⁰Ad nampalintumongà wi nanayaw ta sachí anghel, ngim anana, “Achim à saon chayawon! Afus à Apudyus à chayawom wi maid safali, tan osaà akoy mansilfin Apudyus wi isun sia ya chachi fufurunyu, wi oognantau losan na katuttuwaan wi intudtuchun Jesus. À Apudyus na chayawom!”

Tan na katuttuwaani intudtuchun Jesus, siyan impakaawat na profetas.

Na Nangafakan Na Nangaabfayu Ta Puraw Wi Afayu

¹¹Sachi ad innilà wi niwanit ad langit ad lummoswan osay puraw wi afayu. Ad na nangaabfayu, nangachanan à “Managpati ya Katuttuwaan,” tan nalimpiw na pinagkuisna ya mangufatana ta akufatna. ¹²Ad na atana, isù kilab na apuy. Ya ad-adchuwan na koronan na ali ta uruna. Ad naug-isan na long-agñà ngachan wi maid mangakammu ta miningna nu achi afus à siya. ¹³Ad charachara na silupna. Ad na iyawagchan siyay ngachan, “Na Ukud Apudyus.” ¹⁴Ad na losani surchachud langit, mituntun-udchan siya wi nakasilupchà putilaan ya nakaafayuchà puraw à afayu. ¹⁵Ad à siya, awad na lummoswa ta tupòna wi tachomani sabli wi iyafakna ta losani taku ta aturaturay wi foon à mamaatin siya. Ad iturayana chicha, wi isag istriktun inyòoyyana wi maid makaafak an siya. Tan à Apudyus wi Mannakafalin, ipailana kon pinagchusana ta taku wi isun na mamposposan na astan ta astoná. ¹⁶Ad naug-isan na silupna ya urpunà osay ngachan wi “Alin na losani ali ya Ap-apun na losani ap-apu.”

¹⁷Sachi ad innilà na osay anghel wi umaagsad ta init. Ad pin-awanan losani sissiwit wi asitatayap ad ngatu, wi anana, “Wayyu, man-ooan-ayu

ta annay chakor wi partiyon Apudyus! ¹⁸ Wayyu, anonyun lachag na chachi tuturay ya susurchachu ya kakapitancha ko, ya chachi afayu ya nangaabfayu, ya losani taku uray nangangatu ya nafafa ya uray chachi nasaachan ya chachi maid saadna!"

¹⁹ Sachi ad innilà akon sachì kaog-ogyati animar wi nitapin siyan losani turay ta annay luta ya susurchachucha. Ad naaruscha losan nan-am-amung ta kufatonchan sachì nangaabfayu ta puraw wi afayu ya chachi susurchachuna. ²⁰ Ngim nachòmaan na sachì kaog-ogyati animar ya uray na sachì sinanprofeta wi pinakarong-agna wi nangwanangwa ta kaskaschaaw à insallutna ta losani taku wi namarkaan à markan na sachì animar ya losan akoy takuy manaychayaw ta sachì sinan-animar wi isuna. Ad na nachòmaancha, nitop-archa wi asififiyag ta sachì isù fayfay wi apuy wi kumilakilab wi asupli. ²¹ Ad na losani susurchachucha, napatoycha losan ta sabli wi lummoswa ta tupò na sachì nangaabfayu ta puraw wi afayu. Ad inibsug losan chachi sissiwit na lachagcha.

Na Sillifuy Tawon

20 ¹Sachi ad innilà akon osay anghel wi nan-osog wi narpud langit wi inoognanan chakor wi kachila ya turfi na sachì fitu wi maid pagpag na acharomna. ²⁻³ Ad chinpapnan dragon, wi urog ta awi wi ananchay Satan, ad kinachilaanà siya. Ad imfallun na anghel à siya ta sachì fitu, ad inchaigna ya ingkanchachuna ta maid asinna manallutan ta takud asnay luta ingkanà lumafas na sillifuy tawon. Ad nu marpas na sillifuy tawon, masapur asin miparufus ngim sin-aitan yakay.

⁴Sachi ad innilà na uchumi aachuyan na ali ya chachi tummutùchu wi naadchanchà karobfongan à mangkuis. Ad innilà akon alichodwan chachi napatoy kapu ta nangiwarawakancha ta ukud Apudyus ya katuttuwaan mipangkop an Jesus. Tan achicha pu chinayaw na sachì kaog-ogyati animar ya sinan-animar wi issuissuna, ya achicha pu impamarkan ichaycha ya imacha ta markana. Siyan losancha ummuli nataku ad nakaturaycha an Jesu Cristu ta sachì sillifuy tawon. ⁵Ad sachin chamuy umulian na natoy matakawan. Ngim na uchumi natoy, achicha pu umuli matakau ingkanà marpas na sillifuy tawon. ⁶Maragsakan chachi takuy mitapi ta chamuy umulian na taku matakawan, ya mafinchisyunancha ko, tan foon à mitapicha ta likat na miyagway matayan. Ad à chicha ko, mansilfichà isù pachi an Apudyus ya Jesu Cristu, ya makaturaycha kon siyà sillifuy tawon.

Na Maafakan Satan Ya Mifalluwana

⁷Ad nu marpas na sachì sillifuy tawon, miparufus à Satan ta nifaruchana, ⁸ad umoyna sallutan na losani taku ta luta. Ad man-am-amungona chicha losan, wi maawakanchà Gog ya Magog, ad isakanana

chichà makakufat, wi maid makaflang ta aachucha tan isù aachun na kallis ta tarantag na fayfay. ⁹Ad innilà wi niwarascha losan ta annay luta, ad inaliumchan kummampuwan na takun Apudyus ya uray sachì ili wi isagna ay-ayaton. Ngim na sachì, iningkaw na apuy wi narpud langit ad naskobcha losan. ¹⁰Sachi ad à Satan wi nanallut an chicha, nifallu ta sachì amochi apuy wi kumilakilab wi asupli wi nifalluwan akon sachì kaog-ogyati animar ya sachì pinakarong-agna wi sinanprofeta. Ad mapalikatancha ta pinadcha ya linafi à ing-ingkana.

Na Anungus Na Makuisan Na Taku

¹¹Sachi ad innilà akon chakor ya puraw wi tutùchuwan na Ali wi iningkaw akon tummutùchu. Ad nammaag wi naumas na annay luta ya langit wi maid asin mail-ila. ¹²⁻¹³Sachi ad innilà akon losani nan-ootoy wi taku wi nipasangu ta sachì tummutùchu, wi wachawad na nangangatu ya nafafa ya uray ako chachi nan-ootoy ta fayfay, tan lummoswacha losan, ya uray akon losani nan-ootoy wi iningkaw ad Hades wi ikaw na natoy. Ad sachì wi ummaagsadcha ta sangwanan na sachì tummutùchu, naib-at na chachi nibru wi niyug-isan na losani iningwan na taku. Ad naib-at akon osay nibru wi nilistaan na ngadngachan na losani makafiyag an Apudyus à ing-ingkana. Sachì ad nakuis losan chachi ummuli nataku, wi nifasar ta iningwacha ta atattakucha, wi niyug-is ta chachi nibru. ¹⁴Sachi ad, losan chachi natoy wi narpud Hades, nifallucha ta sachì apuy wi kumilakilab wi isù fayfay. Na sachì fayfay wi apuy, sachin pigwan na matayan wi siyan misinaan an Apudyus à ing-ingkana. ¹⁵Tan sinumani taku wi maid ngachanna ta sachì nibru wi nilistaan na losani makafiyag an Apudyus, chichan nifallu ta sachì apuy wi isù fayfay.

Na Faruy Luta Ya Langit

21 ¹Sachi ad innilà na faruy langit ya faruy luta, wi naumas na sachì chamuy langit ya luta ya uray fayfay. ²Ad innilà akon chumðoray ilin Apudyus wi narpun siyad langit, wi àooyyay Jerusalem. Ad na kinafarun na sachì ili, isù kinamagkit na osay fufai wi nansilup à mamfaruy silup wi para ta mangkasarana.

³Ad chingngor-un chakor wi kinga wi narpa ta tummutùchuwan Ali wi anana, “Inumchas na makaaforoyan Apudyus ta taku, ad na sana, mantakuna chicha. Iingkaw à Apudyus an chicha ad siyan afus à Apudyuschà chaychayawoncha. ⁴Ad punasanan losani luwacha. Ad maid asin matoy ya maid asin manomchom ya man-ifil ya maid asin malikatan, tan losani napasamak an chicha ta chamuy luta, mummaid losan.”

⁵Sachi ad anan na sachì tumutùchu wi manturay, “Na sana, sukatà losan chachi chamuy iningwà ta fumarun asinchuwan!” Ad anana kon

saon, "Iyug-isnun anchayan inukud-u, tan tuttuwa ya mapipiyyar." ⁶ Ad anana ko, "Narpas losan! À saoni nangukud ta anna, saon na nallukiyan na sinuman ya saon akon anungus na losan, tan saon na nangiluki ya mamapog ta asinchuwan. Siyan sinumani mauwaw, painumà ta chanum wi marpu ta chagsi wi fumiyyag à mannaynayun, wi foon à mamfayachò. ⁷ Ad ipatawid-u losan na anchayan ta simumani achi pu paafak an Satan, ya mamfalinò akò siya anàu ta saon na man-Apudyusna. ⁸ Ngim safalin mipatawid ta chachi mangiparufus an Satan à mangafak an chicha, wi isun na chachi nan-awichanchan pammaticha, ya chachi maid pammatichan saon, ya chachi nangwà afafain, ya pumappatoy ya chachi makaààwa ta foon à asawacha, ya chachi isun na mansasarumangka, chachi manayaw ta sinan-Apudyus, ya manturtulli. Tan losani aammaschi, mifallucha ta sachí fayfay wi apuy wi kumilakilab wi asupli, wi sachin ananchay pigwan na matayan."

Na Faruy Jerusalem Wi Marpud Langit

⁹ Sachi ad ummalin saon na osa ta chachi pituy aangheles wi nangisiyat ta iningkaw ta sachí pituy chuyug wi nanapnù anungus na liglikat, ad anana, "Waynu ta ipailà an sia na chachi takun na Pannilu wi niyalig à Asawana."

¹⁰ Sachi ad tiningngilà ta Ispiritun Apudyus, ad isù inyoyà ta anghel ta tuktuk na tànanganí filig. Ad impailanan saon na ilin Apudyus wi faruy Jerusalem wi chumòchòora wi narpun Apudyus ad langit. ¹¹ Ad sumilap na sachí ili ta kinafarun Apudyus wi isù sarming. Na kinasilapna, isun na silap na nanginay fatu wi ananchay jasper. ¹² Ad naarad na sachí ilì tànangan wi tuping, wi nasawaran à chuwan liwanganna wi nakuwarchaan akò nasawaran à chuwa aangheles. Ad na sachí liwanganna, niyug-isan akon ngachan chachi nasawaran à chuway an-ananà Israel wi nginkanà ta losani Judio. ¹³ Ad na liwanganna, turun awad ta apot ta sumingitan na init, ya turu kon awad ta apot ta masiutan na init, ya turu kon awad ta apot ta chaya ya turun awad ta apot ta lakud. ¹⁴ Ad na sachí arad, nasawaran à chuwa kon pon-adna wi niyug-isan na ngachan chachi nasawaran à chuway apostoles na sachí Pannilu.

¹⁵ Na sachí anghel wi nakaukud an saon, nanangchon à falituk à paraisong wi iyisongna ta sachí ili ya aradna ya liwanganna. ¹⁶ Na sachí ili, man-iisun aanchuna ya achakorna ya atànangna. Ad na nangisngan na anghel ta sachí ili, ummoy à chuway lifu ya opat kasuti kilometron aanchuna wi isun akon achakorna ya uray na atànangna. ¹⁷ Ad inisongna kon aradna, ad na atànangna, nasuruk à onompuru ya onomi metro.

¹⁸ Ad na sachí ili, losan falituk ad musilingan wi isù sarming. Ad na aradnay tuping, losan jasper, wi nanginay fatu. ¹⁹ Ad na pon-adnay nasawaran à chuwa, naar-arkusan losan à akarakarasi wi nanginay fatu.

Na namon-ad, fatuy jasper; na misùnub, fatuy safiro; na miyatlu, fatuy kalsedonia; na miyapat, fatuy esmeralda;²⁰ na miyalima, sardonika; na miyanom, karnelia; na miyapitu, krisolito; na miyawaru, berilo; na miyasiyam, topasio; na miyasimpuru, krisoprasio; na miyasawar à osa, hasinto; ad na miyasawar à chuwa, amatista.²¹ Ad na liwangan wi nasawaran à chuwa, sin-ossay chachakkor wi perlas. Ad na arsa ta sachì ili, falituk wi napungsan wi isù musiling na sarming.

²² Ngim maid templò innilà ta sachì ili, tan iingkaw à Apudyus wi Mannakafalin wi Ap-apu ya sachì Pannilu, wi chichan isù templo wi machaychayaw.²³ Na sachì ili, foon à masapurnan init ya furan à silawna tan masilawan ta linang wi kachayawan Apudyus ya linang na Pannilu.²⁴ Ad losan na taku ta lufung, masilawancha ta linang na sachì ili, ad na losani ali ta luta, iyoychan kinafaknangcha ta sachì ili.²⁵ Ad chachi liwanganna, miwawayyang wi foon pù miyoonnob tan maid pu lumafiyayanad aschi.²⁶ Ad losan akon kinafaknang ya chayaw na arutaruta, maiyoycha losan ta sachì ili.²⁷ Ngim achi pu mafalini lumnò na sinumani mangwà lawing wi isun na manturtulli ya mangwà afafain. Tan na afusi lumnò, chachi nilistan ngachancha ta nibrun na Pannilu wi nilistaan na losani ingkaw an Apudyus à ing-ingkana.

22 ¹Ad impailan akon anghel an saon na chawwang wi na chanumnay lin-ongan, fumiyyag. Na sachì chawwang, lummoswa ta tumutùchuwan Apudyus ya sachì Pannilu. ²Ad umayus ta kawan na arsa ta sachì ili. Ad na nampaikid ta sachì chawwang, awad na imong wi mamiyyag ta taku, wi finurani mamkas. Ad na tufucha, usaroncha iyakas ta losani taku ta ailiili. ³Ya maid ako màchasan ta sachì ilì uray sinuy lawingon Apudyus.

Afus à Apudyus ya sachì Pannilu à manturay ta sachì ili, ad na losani mansilfin Apudyus, chaychayawonchà siya.⁴ Ilancha kon fosarna ya maug-isan akon ichaychà ngachanna.⁵ Ya maid asin lumafiyana siyan foon à masapurchan silaw ya init, tan Apudyus wi Apu na silawcha. Ya isuchà ali wi manturay à ing-ingkana wi maid pagpagna.

Na Mangulinan Jesus

⁶ Sachì ad anan na anghel an saon, “Tuttuwani losani naifakan sia ya sikurachuy màwa, tan à Aputauy Apudyus wi nangatod ta Ispirituna ta chachi profetasna, siya kon nangifaun an saoni anghelnà mangipaakammun chiayuy mansilfin siya ta losani masapur màwa wi foon à mafayag ad màwa.”

⁷ Ad anan ako Jesus, “Chongronyuna, tan foon à mafayag ad mangulinà! Maragsak na losani mamtog ta losani niyug-is ta annay nibru!”

⁸ Saoni Juan na nangngor ya nangila ta anchanaya losan. Ad narpas ad wi chingngor-u ya innilà losan, nampalintumongà ta sangwanan na sachì

anghel wi nanayaw an siya. ⁹Ngim ingkimaunà saon, anana, “Achim amasnaton, tan osaà akoy mansilfin Apudyus wi isun sia ya chachi koy fufurunnuy profetas ya uray losani mamtog ta niyug-is ta annay nibru. Siyan à Apudyus na afusi chayawom!”

¹⁰Ad anana kon saon, “Achim ilummong na inyug-isnu ta sanati nibru wi impaakammù an sia, tan chanchanin màwaancha. ¹¹Ad na sachi timpu, losani mangwà lawing, uray ituruycha oyyoon, isun akon mangwà afafain, iturturuycha ko. Ngim na losani mangwà mamfaru ya mangwa ta sinumani pion Apudyus, iturturuycha ko oyyoon.”

¹²“Chongronyuna!” anan ako Jesus. “Foon à mafayag ad mangulinà! Ad awitò na ikunkunà ta losani taku wi sufalit na losani ining-ingwacha. ¹³Saon na nallukiyan na sinuman ya saon akon anungus na losan, tan saon na nangiluki ya mama pog ta asinchuwan.”

¹⁴Naragsak na losani manàsasàsà ta silupcha tan annan karobfonganchay mangan ta fungan na imong wi mamiyag ta taku ya karobfonganchay lumnò ta sachi farfaruy ili. ¹⁵Ngim achi pu mafalini makarnò na chachi mangwamangwà afafain, ya chachi isun na mansasarumangka, ya makaààwa ta foon à asawacha, ya pumappatoy, ya chachi manayaw ta sinan-Apudyus, ya uray chachi manturtulli ta ug-ugkudcha ya oy-oyyooncha. Siyan maid pu makarnò ta amaschi ta sachi farfaruy ili.

¹⁶Ad anan ako Jesus, “Saon à Jesus wi nangifaun ta anghel-ù mangifaka ta anchanayan chiayuy mamati wi maamuamung ta ailiili. Mismuy kanaà an David, ya saon akon maawakan à amfikaton.”

¹⁷“Wayyusna!” anan na Ispiritun Apudyus ya chachi miyalig à asawan na Pannilu.

“Oo, wayyu losan,” anan akon losani mangngor ta annaya.

Umaliayu kuma, losan-ayuy nauwaw, tan sinumani maryad, uminum ta chanum wi fumiayag wi maid fayachana.

¹⁸À saoni Juan, warningà chiayu losan wi mangngor ta impaakammù ta annay nibru wi màwà tapin na padcha, tan nu awad manoka ta annayay niyug-is ta nibru, chogchog-an Apudyus na chusana wi siyan nifaka ta annay nibru. ¹⁹Ad sinumani aananan uray sinuman ta anchanayay niyug-is, aanon ako Apudyus na fingayna ta fungan na imong wi fumiayag, ya aanonka kon karobfonganay lumnò ta Ilin Apudyus wi nifaka ta annay nibru.

²⁰À Jesus wi nangipaakammu ta anchanaya losan, anana ko, “Tuttuway foon à mafayag ad mangulinà!”

Ad anà ako, “Oo, mangulin-a, Apu Jesus!”

²¹Na chawat-u, ta fadngan chitau losan an Apu Jesus.